

1 SAMUEL

(1 Chamué)

Tupana rü Ánaxũ narüngũxêê nax
naxãxacũcãx

1 ¹Rü nayexma ga wüxi ga duũ ga Eucánagu áégacü. Rü nüma rü Efraítanũxũ nixĩ rü ãane ga Ramágu naxãchiũ. Rü guma ãane rü máxpũxanexũ ga Efraítanũxũwa nayexma. Rü nüma ga Eucána rü Yeruáũ nane nixĩ, rü Yeruáũ rü Eriú nane nixĩ, rü Eriú rü Tóu nane nixĩ, rü Tóu rü Chúfe nane nixĩ. ²Rü guma Eucána rü nüxũ iyexma ga taxre ga naxmãx. Rü wüxi ga naxmãx rü Ána nixĩ ga ngiéga, rü yema nai ga naxmãx rü Peniná nixĩ ga ngiéga. Rü yema naxmãx ga Peniná rü ixãxacü, notürü ga yema naxmãx ga Ána rü ingexacü. ³Rü guxcüma ga tauncügu rü nüma ga Eucána rü wüxigu naxmãxgümaxã guma ãane ga Chíruwa naxũxũ nax Tupana ya guxãétüwa ngëxmacüxũ yacuãxũxũcãx, rü naxcãx yamáaxũcãx rü yaguãxũcãx ga norü ãmare. Rü guma ãanewa nayexma ga wüxi ga chacherdóte ga Erígu áégacü. Rü nüma rü nüxũ nayexma ga taxre ga nanegü ga chacherdótegü ixgũxũ. Rü wüxi rü

Opíni nixĩ ga naéga, rü yema to rü Finéya nixĩ ga naéga. ⁴Rü yexguma Eucána norü ãmare Tupanana naxãxgu, rü naxmãx ga Peniná rü ngĩxũ naxüarü ãmareãx, rü ga naxacügu rü ta nayaxüarü ãmareãx. ⁵Notürü ga naxmãx ga Ána rü taxre ga ãmare ngĩxna naxã yerü porãcü ngĩxũ nangechaũ woo Tupana ngĩxũ nax ngexacũxêxũ. ⁶Rü yema nax nangexacũxũcãx ga Ána, rü ngĩma ga Peniná rü guxũguma Ánagu iyadauxcüraxũ rü ngĩxũ icugü. ⁷Rü guxcüma ga tauncügu ga yexguma Tupanapatawa naxĩxũgu rü ngĩma ga Peniná rü yemaacü Ánaxũ icugüaxũ. Rü yemacãx ga Ána rü ngĩgümaxã ingechaũ rü ixaxu rü tama ichibüchaũ. ⁸Rü nüma ga Eucána rü naxmãx ga Ánana naca rü nhanagürü ngĩxũ: —¿Taxacũcãx cuxaxu? ¿Rü taxacũcãx cungechaũ rü tama cuchibü? ¿Tama êxna i chama rü 10 ya cunearü yexera cuxũ chamexũ? —nhanagürü. ⁹Rü yexguma ãane ga Chíruwa nayexmagügu, rü wüxi ga yáuanecü ga chibüwena rü ngĩma ga Ána rü Tupanapatawa ixü. Rü nüma ga chacherdóte ga Erí rü norü tochicaxũ ga nawa natooxũwa narüto ga

Tupanapataarü ñaxarü ngaicamána.
 10Rü ngíma ga Ána rü poraäcü ixaxu, rü ngígümaxã ingechaũ, rü yemaacü iyumüxê, rü Tupanana ica. 11Rü ngírü yumüxêwa rü Tupanamaxã ixuneta rü ngígürügü: —Pa Tupana ya Daxüwa Ngëxmacüx, rü ngëxguma chi nüxü cucuaxgu nax nhuxäcü ngüxü nax chingexü naxçax i ngëma nax changexacüxü ;rü choxü nüxü naxínü i nhaa chorü yumüxê, rü choxna namu ya wüxi ya chaune! Rü yimá rü tá cuxna chanamu nax cuxrüxü yixixüçax. Rü ngëma norü cuaxruxü nax aixcuma cuxna chanamuxü rü tagutáma niyoeru —ngígürügü. 12Rü ngíma ga Ána rü imáarü yumüxêax nax Tupanamaxã yadexaxü, rü nüma ga Erí rü ngíaxgu nadawenü. 13Rü ngíma rü ngíaxêwa iyumüxê, rü tama nüxü taxínü ga ngíga. Rü ngíaxicatama nixí ga ixíaxcüüxü. Rü yemaçax ga Erí rü nagu narüxínü ga nax nangäxüxü. 14Rü nhanagürü ngíxü: —¿Nhuxäcü i ngäxäcü nua cuxüxü? ;Rü marütama nax cungäxexaxü! —nhanagürü ngíxü. 15Rü ngíma ga Ána rü inangäxü rü ngígürügü: —Tama nixí i changäxüxü, Pa Corix. Tama nixí i taxacü rü axchiü i ngúchixáxü rüexna wíu ya ngúchixacü chayaxaxüxü. Rü ngëma choxü ngupetüxü nixí nax changexacüxü rü ngëmacax changechaũ, rü Tupanamaxã nüxü chixuxü i ngëma guxchaxü. 16;Rü tauxü i nagu curüxínüxü rü chama rü wüxi i nge i chixecü chixixü! Rü guxüma i nhaa ngunexügügu rü íchayumüxê naxçax i ngëma chorü oégaãxê rü íxächíãxê —ngígürügü. 17Rü yexguma ga Erí rü ngíxü nangäxü rü nhanagürü:

—;Ëcü taãxêäcü natáegu! ;Rü nüma ya Iraéuanecüaxgüarü Tupana rü cuxna naxãã i ngëma nüxna naxçax cucaxaxü! —nhanagürü. 18Rü ngíma ga Ána rü inangäxü rü ngígürügü: —Moxëxüchi naxçax i ngëma dexa —ngígürügü. Rü nhuxüchi itáegu rü iyachibü rü marü taguma wena ingechaũ. 19Rü moxüäcü rü nangunetüxüegü ga Tupanapatawa nax naxíxü nax nüxü yanacuaxüügüxüçax. Rü yemawena rü napataçax nawoegu ga ñane ga Ramáwa. Rü nüma ga Eucána rü naxmãx ga Ánaxü nape. Rü nüma ga Tupana rü nanangäxü ga ngírü yumüxê. 20Rü yemaçax ga Ána rü ixäxäcü. Rü yexguma nawa nanguxgu ga nax nabuxü ga guma ngíne, rü inaxüéga rü Chamué nixí ga naéga yerü Tupanana naxçax ica. Rü ngëma naéga rü “Naxçax ínacaxacü”, nhaxüchiga nixí. 21Rü guma nai ga taunecügu rü nüma ga Eucána rü naxmãx ga Peninámaxã rü guxüma ga naxacügümaxã rü ñane ga Chíruwa naxí nax Tupanana yéma yaxäxüçax ga norü ämaregü, rü nüxü yanacuaxüügüxüçax yema guxcüma ga taunecügu naxüüxürüxü. 22Notürü ga naxmãx ga Ána rü tama yéma ixü, rü ngígürügü nüxü ga ngíte: —Taxütáma ngéma chaxü i chama nhuxmatáta yamaie ya daa bucü. Rü ngëxgumaxica tá nixí i ngéma chanagaxü nax Cori ya Tupanana chayamuxüçax rü ngëxma nax yanaxäxüxüchixüçax —ngígürügü. 23Rü nüma ga ngíte ga Eucána rü ngíxü nangäxü rü nhanagürü: —;Ëcü naxü i ngëma cuma nagu curüxínügu rümexü! Rü marü name i nuxã curüxäxü rü nhuxmatáta cuyamaie ya yimá cune nax

ngêmaãcü yanguxêãxũçax i norü ngúchaũ ya Cori ya Tupana. Rü yemaacü ga ngĩma rü yexma iruxãũx, rü inayaxêxê ga guma ngĩne rü nhuxmatáta yamaie —nhanagürü. ²⁴Rü yexguma marü yamaieãguwena ga guma bucü rü Cori ya Tupanapatawa inaga ga ãane ga Chĩruwa. Rü yexgumarũxü ta yéma inagagü ga tamaepũx ga wocaxacü ga iyatũxü, rü wüxiwetaxü ga trĩgu, rü wüxi ga tũxũacu ga wĩu. ²⁵Rü yexguma wüxi ga wocaxacü Tupanacax yamãxgũguwena, rü chacherdóte ga Erĩna nayamugü ga guma bucü. ²⁶Rü ngĩma ga Ána rü ngĩgürügü nüxü ga guma chacherdóte: —Pa Corix ¿choxü cucuáxü yixĩxü? Rü chama nixĩ ga yema nge ga ũpa cupexewa Tupanana chacaxaxü chortü yumüxêwa. ²⁷Rü nüxna chacaxaxü nax choxna namuaxũçax ya daa chaune, rü nüma rü marü choxü nangãxü ga yema naxçax íchacaxaxü. ²⁸Rü ngêmacax i nhuxmax rü nua cuxũtawá chana ga ya daa chaune nax nüxna chayamuxũchixũçax ya Tupana —ngĩgürügü. Rü nhuxũchi ga nüma ga Erĩ rü nhaxtũanegu nayangücuchi rü Cori ya Tupanaxü nicuaxũxü.

Ánaarü yumüxê

2 ¹Rü nhaãcü iyumüxê ga Ána: —Pa Corix, rü poraãcü cumaxã chataãxê erü choxna cunamu ya chaune. Rü nhuxmax rü choxü natauxcha nax chanangãxũgaxü i ngêma choxü cugüxü erü cuma choxü curüngũxê. Rü ngêmacax chataãxêxũchi. ²Rü tataxuma ya texé ya cuxrũxü üünexe, Pa Corix. Rü tataxuma ya texé cuxrũxü

duũxêgüna dáuxe, Pa Torü Tupanax. Rü nataxuma i taxacü i cuxü rüyexeraxü —ngĩgürügü.

.....

¹¹Rü nhuxũchi nüma ga Eucána rü naxacüãxgü rü naxmãxgũmaxã napataçax nawoegu ga ãane ga Ramáwa. Notürü nüma ga guma nane ga bucü rü yexma chacherdóte ga Erixũtagu narũxãũx nax yéma Cori ya Tupanaaxü napuracũxçax.

.....

Chamuéxü nayaxu ga Cori ya Tupana

¹⁸Rü nüma ga guma bucü ga Chamué rü niyachigü rü Cori ya Tupanaaxü napuracü. Rü naxchiru rü chacherdótegüchirurũxü nixĩ nax lüchinaxçax yixĩxü. ¹⁹Rü wüxichigü ga taunecügü ga yexguma norü mamá tũmatemaxã guma Tupanapatawa taxĩxũgu nax Tupanacax yéma tanangegũxçax ga tũmaarü ãmaregü, rü Chamuéçax rü ta yéma tanangeexü ga wüxi ga naxchiru ga nüxü taxũxü. ²⁰Rü nüma ga guma chacherdóte ga Erĩ rü Eucánamaxã rü naxmãxmaxã mexü naxuegu rü nhanagürü: —Nüma ya Cori ya Tupana rü tá cuxü nanaxũtanü namaxã nax cuxü nax yaxãxacũxchigũxçax i nhaa nge natanü ya yimá ngĩne ya Corina namuãcü —nhanagürü. Rü yemawena ga Eucána rü Ána rü napataçax nawoegu. ²¹Rü nüma ga Cori ya Tupana rü Ánaxü narüngũxêê rü yemaçax iyaxãxacũxchigü. Rü yemaacü tamaepũxwa nangu ga ngĩne rü taxre ga ngĩxacü. Rü yoxni ga guma ngĩne ga Chamué rü Tupanapexewa niyachigü. ²²Rü nüma ga guma

chacherdóte ga Erí rü marü poraäcü
 nayaxüchi. Notürü nüxü nacuaxama ga
 yema chixexü ga nanegü ixügüxü, rü
 nhuxäcü yema ngexügü ga
 Tupanapataarü ücuchicawa
 puracüexümaxä nax namaxëxü. ²³Rü
 yemacax nanegüxü nhanagürü:
 —Guxüma i duüxügü rü chamaxä nüxü
 nixugügü nax nhuxäcü chixexü pexügüxü
 rü chixri pemaxëxü. ¿Rü tñxcüü
 ngëmaäcü pemaxë? ²⁴Rü dücax, Pa
 Chaunegüx, rü nachixexüchima nixi i
 ngëma ore i Tupanaarü duüxügü nüxü
 nixugügüxü i pechiga. ²⁵Rü ngëxguma
 wüxi i duüxü rü to i duüxümaxä chixexü
 üxgux rü nangexma i norü mexëeruxü.
 Notürü ngëxguma wüxi i duüxü
 Tupanamaxä chixexü üxgux ¿rü texé tá
 tanamexëxë i ngëma? —nhanagürü.
 Nottürü ga nümagü ga nanegü rü tama
 naga naxinüechaü, yerü ga Tupana rü
 marü namaxä nanaxuegu ga nax
 nadaiaxü. ²⁶Rü yoxni ga nüma ga guma
 ngextüxcüü ga Chamué rü niyachigü. Rü
 Cori ya Tupana rü poraäcü namaxä
 nataäxë, rü duüxügü rü ta namaxä
 nataäxëgü.

.....

Tupana rü Chamuéxü naca

3 ¹Rü nüma ga ngextüxcüü ga
 Chamué rü Cori ya Tupanaaxü
 napuracü yema Erí namuxüäcüma. Rü
 yexguma ga Tupana rü nhuxguacürica
 texémaxä nidexa. Rü nhuxguacürica
 texécax nanangoxëxë ga ëxügüxü. ²Rü
 nüma ga Erí rü marü naya rü yemacax
 marü nixoxetü rü tama mea taxacüxü
 nadau. Rü wüxi ga chütaxügu rü norü
 ucapuwa ínape ga Tupanapatawa. ³Rü

nüma ga Chamué rü yema baü ga
 Tupanaarü mugü nawa
 yexmaxüxütaguama nape. Rü yema norü
 omü ga guma Tupanapata rü nanaiecha.
⁴Rü wüxi ga chütaxü rü nüma ga Cori ya
 Tupana rü Chamuéxü naca rü
 nhanagürü: —Pa Chamué, Pa Chamué
 —nhanagürü. Rü nüma ga Chamué rü
 nanangäxü: —Daxe chixi —nhanagürü.
⁵Rü yexgumatama ínärüda ga yema
 ínapexüwa rü Erí íyexmaxüwa nanha, rü
 nhanagürü: —Daxe chixi rü nua
 changexma. ¿Rü taxacücxax chaüxcax
 cuca? —nhanagürü. Rü nüma ga Erí rü
 nanangäxüga rü nhanagürü: —Taguma
 nixi i cuxcax chacaxü. ¡Ëcü natáegu rü
 yape! —nhanagürü. Rü yexguma ga
 nüma ga Chamué rü natáegu rü nayape.
⁶Notürü nüma ga Cori ya Tupana rü
 wenaxarü Chamuéna naca rü nhanagürü:
 —Pa Chamué —nhanagürü. Rü nüma ga
 Chamué rü ínärüda, rü Erí íyexmaxüwa
 nanha rü nhanagürü: —Daxe chixi rü
 nua changexma. ¿Taxacücxax chaüxcax
 cuca? —nhanagürü. Rü nüma ga Erí rü
 nanangäxüga rü nhanagürü: —Taguma
 nixi i cuxcax chacaxü, Pa Chaunex. ¡Ëcü
 natáegu rü yape! —nhanagürü. ⁷Rü
 nüma ga Chamué rü tama nüxü nacuax
 nax Cori ya Tupana yixixü ga namaxä
 idexaxü yerü ga aixrügumaäcü taguma
 namaxä nidexa. ⁸Notürü yema
 chütaxügu rü nüma ga Cori ya Tupana rü
 norü tamaepüxcüna Chamuéna naca. Rü
 nüma ga Chamué rü ínärüda rü
 Eríxütawa nanha rü nhanagürü: —Daxe
 chixi, rü nua changexma. ¿Rü taxacücxax
 chaüxcax cuca? —nhanagürü. Rü nüma
 ga Erí rü nüxü nicuaxächi ga Cori ya
 Tupana nax yixixü ga gumá Chamuéna

çaxacü. ⁹Rü nüma ga Erí rü Chamuéxü nhanagürü: —¡Ëcü yape! Rü ngëxguma Cori ya Tupana wena cuxna caxgu ¡rü nangäxüga rü nhacuxü tá: “Rü idexa rü yimá curü duü rü nüxü naxínü nixí”, nhacuxü tá! —nhanagürü. Rü yexguma nüma ga Chamué rü natáegu rü nayape. ¹⁰Rü yemawena ga nüma ga Cori ya Tupana rü wenaxarü Chamuéxü naca ga yema noxri nüxü nacaxgurüütama, rü nhanagürü: —Pa Chamué, Pa Chamué —nhanagürü. Rü nüma ga Chamué rü nanangäxüga rü nhanagürü: —¡Idexa! Rü cuxü naxínü nixí ya curü duü —nhanagürü. ¹¹Rü nüma ga Cori ya Tupana rü nhanagürü: —Nhuxma rü Iraéuanecüäxgütanüwa tá chanaxü i taxacü i guxätáma namaxä baxächiechü. Rü guxäma ya nüxü ñnüxe rü tá namaxä tanguxmachixëgü. ¹²Rü ngëma ngunexügu rü taxütáma chanangupetüxëxë i guxüma ga yema Erímaxä nüxü chixuxü ga nanegüchiga. ¹³Rü namaxä nüxü chixu rü tá chanapoxcue i ngëma nanegü naxçax i ngëma chixexü i nüma marü nüxü nacuáxü. Yerü ga nanegü rü chixexü chamaxä nixugüxe rü nüma rü tama nüxna nachogü naxçax ga yema chixexü ga naxügüxü. ¹⁴Rü ngëmacax i nhuxmax rü Erí nanegümaxä chanaxuegu nax taxütáma nüxü nüxü nax changechäxü i norü chixexügü woo naxünagü çaxçax inaguxgu rüexna ämaregü choxna naxuaügügu —nhanagürü ga Tupana. ¹⁵Rü yemawena ga Chamué rü nape nhuxmata moxüäcü yangune. Rü yexguma ínadxgu rü inanawäxä ga Tupanapataarü ñäxgü. Notürü nüma ga Chamué rü namuü ga Erímaxä nüxü nax

yaxuxü ga yema dexa ga Tupana namaxä nüxü ixuxü. ¹⁶Notürü nüma ga Erí rü Chamuéçax naca rü nhanagürü nüxü: —Pa Chaunex, Pa Chamué —nhanagürü. Rü nüma ga Chamué nanangäxüga rü nhanagürü: —Daxe chixí —nhanagürü. ¹⁷Rü nüma ga Erí rü Chamuéna naca rü nhanagürü: —¿Nhuxü nhaxü yixixü cuxü ya Cori ya Tupana? ¡Rü guxüxütáma chamaxä quixu, rü taxuxütáma iquicux! Rü Tupana poraäcü cuxü poxçux ega taxütáma guxü i ngëma cumaxä nüxü yaxuxüxü chamaxä quixuxgu —nhanagürü. ¹⁸Rü nüma ga Chamué rü guxüxüma Erímaxä nixu rü taxuüma iniicux. Rü nüma ga Erí rü nabaxächi rü nhanagürü: —Nüma nixí i Cori ya Tupana yixixü. ¡Ëcü naxüä i ngëma naxçax rümemaexü! —nhanagürü. ¹⁹Rü nüma ga Chamué rü niyachigü, rü Cori ya Tupana rü nanaxütagu. Rü guxüma ga duüxügü rü meama nüxü inarüxinüe ga norü ucuxëgü. ²⁰Rü Dáüwa inaxügü, rü nhuxmata Bechébawa nangu ga Chamuéxü nax nacuxgüxü ga guxüma ga Iraéuanecüäxgü ga nax aixcuma Tupanaarü orearü uruxü nax yixixü. ²¹Rü nüma ga Cori ya Tupana rü inayadaxëxë ga Chamuémaxä nüxü nax yaxuxü ga norü ore nawa ga guma Tupanapata ga Chíruwa yexmane. Rü nüma ga Chamué rü nhuxüchi duüxügümaxä nüxü nixu ga yema norü ore ga Tupana.

**Firitéutanüxügü rü nachixüanewa
nanangegü ga yema baü ga
Tupanaarü mugü nawa yexmaxü**

4 ¹Rü yema ga ngunexügügu ga Iraéuanecüäxgü rü Firitéutanüxügümaxä nügü nadai. Rü ga

Iraéuanecüãxgüarü churaragü rü ãane ga Ebenéhearü ngaicamána nayexmagü rü Firitéutanüxügüarü churaragü rü ãane ga Aféwa nayexmagü. ²Rü nüma ga Firitéutanüxügü rü nügü namexêxê nax Iraéuanecüãxgümaxã nügü nadaixüçax. Rü yexguma nügü nadaixgu, rü nüma ga Firitéutanüxügü rü Iraéuanecüãxgüxü narüporamaegü rü tüxü nadai ga 4,000 ga norü churaragü. ³Rü yexguma yema ínapegüxüçax nawoeguxgu ga Iraéuanecüãxgüarü churaragü rü yema namaxã icuaxgüxü rü nügümaxã nipuragatanüçüxü nachiga ga yema nax Firitéutanüxügü nadaixü, rü nhanagürügü nügümaxã: —¿Tüxcüü i nhüxmax ya Tupana i Firitéutanüxügüxü naxüchicaxü nax tüxü nadaixüçax? ¿Rü ngĩxã Chíruwa taxĩ rü tayayaxu i ngêma baú i Cori ya Tupanaarü mugü nawa ngêxmaxü nax ngêmaãcü i nüma rü tatanüwa nangexmaxüçax rü tüxü ínapoxüxüçax nüxna i ngêma tórü uanügü! —nhanagürügü. ⁴Rü yemacax ga Iraéuanecüãxgü rü nhuxre ga churaragü Chíruwa namugü. Rü yéma nayayauxgü ga yema baú ga nawa nayexmaxü ga norü mugü ga Cori ya Tupana ya guxüétüwa ngêxmacü. Rü Opíni rü Finéya ga yema taxre ga Erí nanegü rü yema baú ga Cori ya Tupanaarü mugü nawa yexmaxüxüta nixixütanü.

¹⁰Notürü ga yema Firitéutanüxügü rü Iraéuanecüãxgüxü nadai. Rü nüma ga Iraéuanecüãxgü rü nixü, rü yema ínapegüxüwa nabuxmü. Rü nayue ga muxüma ga Iraéuanecüãxgüarü churaragü, rü 30,000 wa nangu. ¹¹Rü

yexgumarüxü ta nanapugü ga yema baú ga Tupanaarü mugü nawa yexmaxü, rü nanadai ga Opíni rü Finéya ga yema taxre ga Erí nanegü. ¹²Notürü wüxi ga churara ga Bëyamítanüxü ixixü rü ninha ga yema nügü ínadaixüwa rü yematama ngunexügu Chíruwa nangu. Rü norü ngechaümaxã nügü nayarügáutechiru, rü nügü nabuxeru, rü yemaacü ínangu. ¹³Rü yexguma yéma nanguxgu ga yema churara rü nüma ga Erí rü íãxwa narütö nawa ga yema norü tochicaxü. Rü namagu ínadawenü yerü naxçax naxoegaãxê ga yema baú ga Tupanaarü mugü nawa yexmaxü. Rü yema yatü rü guma ãanegu naxücu rü nüxü nixu ga yema ngupetüxü. Rü yexgumatama ga guxüma ga duüxügü rü inanaxügüe ga poraãcü nax naxauxexü. ¹⁴Rü yemaxü naxínügu ga Erí rü ínaca rü nhanagürü: —¿Taxacüchiga nixĩ i ngêma nax íyacucuxü? —nhanagürü. Rü nüma ga yema churara rü nanhüxãxê ga Erímaxã nüxü nax yanaxuxü ga yema ngupetüxü. ¹⁵Rü nüma ga Erí rü nüxü nayexma ga 98 ga taunecü rü marü natauxetüxüchi ga yexguma. ¹⁶Rü nüma ga churara rü nhanagürü: —Nhüxmatama íchangu i ngêma togü ítadaixüwa nax ne chanhaxü. Rü nhüxmatama chinha i nawa i ngêma dai —nhanagürü. Rü nüma ga Erí rü nüxna naca rü nhanagürü: —¿Taxacü nangupetü, Pa Chaunex? —nhanagürü. ¹⁷Rü nüma ga yema churara rü nanangãxüga rü nhanagürü: —Nüma i Iraéuanecüãxgü rü Firitéutanüxüchaxwa nibuxmü nhüxmachi muxema ya tatanüxexü nadai. Rü ngêmatanügu nayue ya yimã taxre ya cune ya Opíni rü Finéya, rü

ngêma baú i Tupanaarü mugü nawa ngêxmaxü rü Firitéutanüxügü nanapugü —nhanagürü. ¹⁸Rü yexguma yemaxü naxínügu ga Erí, ga Firitéutanüxügü nax napuxü ga yema baú ga Tupanaarü mugüchixü, rü norü tochicaxüwa ínawax rü îâxütágu nangu. Rü yema nax nayaxüchixü rü yangüxü, rü yemaçax nibüyenaxã ga yexguma nanguxgu, rü yexma nayu. Rü nüma ga Erí rü 40 ga taunecü nixí ga Iraéuanecüâxgümaxã inacuáxü.

.....

**Firitéutanüxügü rü nachixüanewa
nanangegü ga yema baú ga
Tupanaarü mugüchixü**

5 ¹Rü yexguma marü yapugüâxgu ga yema baú ga Tupanaarü mugüchixü, rü nüma ga Firitéutanüxügü rü íane ga Ebenéchewa nanayauxgü rü norü íane ga Asdódewa nanangegü. ²Rü nhuxüchi norü tupana ga Dagóúpatawa nanangegü rü yema naxchicünaxãxütágu nanaxügü. ³Rü moxüâcü ga yexguma ínangugüga ga yema Asdódecüâxgü, rü Dagóúchicünaxãxü inayangaugü ga nhaxtümüanegumare nguxü napexegu ga yema baú ga Tupanaarü mugü nawa yexmaxü. Rü yexguma ga yema duüxügü rü nanayauxgü ga yema Dagóúchicünaxã rü wena nachicagu nanachixëégü. ⁴Notürü yexguma moxüâcü paxmama yéma naxíxgu ga yema Asdódecüâxgü, rü nüxü inayangaugü ga Dagóúchicünaxã ga wenaxarü nhaxtümüanegu ümarexü napexegu ga yema baú ga Tupanaarü mugü nawa yexmaxü. Rü ga naeru rü

guma taxre ga naxmex rü nabüü rü îâxgu nayanúmare. Rü yema naxünerica nixí ga mexü. ⁵Rü ngêmacax nixí i woo i nhuxmax i ngêma Dagóúarü chacherdótegü rü ngêxguma yima tupauca ya Asdódewa ngexmanegu nachocuxgu rü tama ngêma mürapewa i îâxwa itoxexüwa nangagüxü. ⁶Notürü nüma ga Cori ya Tupana rü nanapoxcxe rü ínanabaixgü ga yema duüxügü ga Asdódecüâxgü, rü taixnamaxã nayadaçaweexëxë. ⁷Rü yemaxü nadaugüga ga yema duüxügü ga Asdódecüâxgü rü nhanagürügü: —Ngêma baú ya Iraéuanecüâxgüarü Tupanaarü íxixü rü tama tanaxwaxe i tatanüwa nax nangexmaxü erü ngêmagagu nixí i ngêma Tupana rü taxçax rü tórü tupana i Dagóúçax rü poraäcü guxchaxü ínanguxëxëxü —nhanagürügü. ⁸Rü yemaçax ga yema Asdódecüâxgü rü guxüma ga Firitéutanüxügüarü âëxgacügüçax nangema nax namaxã nangutaquexegüxüçax. Rü nüxna nacagüe rü nhanagürügü: —¿Taxacü tá namaxã íxügüxü i ngêma baú i ngêma Iraéuanecüâxgüxüarü Tupanaarü mugüchixü? —nhanagürügü. Rü yema âëxgacügü rü nanangãxüga rü nhanagürügü: —¿Ëcü íane ya Gáyiwa penangegü! —nhaxümaxã nanangãxügü. Rü nüma ga yema Firitéutanüxügü rü yéma guma íanewa nanangegü. ⁹Notürü yexguma marü yéma nangegüâxguwena, rü nüma ga Cori ya Tupana rü yema íanecüâxgüxü nayaxíxãchiãëxëégü, yerü taixnamaxã nayadaçaweexëxë ga guxüma ga duüxügü ga ibuxü rü iyaxü. ¹⁰Rü

yexguma ga nūma ga Firitéutanūxūgū rü ãane ga Ecróũwaama nanangegū ga yema baú ga Tupanaarū mugūchixū. Notürü yexguma Ecróũwa nanguxgu ga yema baú, rü yema duũxūgū ga Ecróũcūãxgū rü nixaixcha rü nhanagürügü: —¿Tüxcüũ nua penange i ngēma Iraéuanecüãxgüarü Tupanaarū mugūchixū nax toxū nadaixūcax ya guxāma? —nhanagürügü. ¹¹Rü guma ãanewa rü guxūma ga duũxūgū rü nanaxĩxachiãxēgū, yerü Tupana rü poraãcū nanapoxcue. Rü yemacax ga yema ãanecüãxgū rü guxūma ga Firitéutanūxūgüarü ãëxgacügücax nangema rü nhanagürügü nüxū: —¡Nua torü ãanewa ípenangexechi i ngēma baú i Iraéuanecüãxgüarü Tupanaarū mugūchixū, rü nachixūãanecaxtama penatæguxēxē nax tama toxū nadaixūcax i guxāma i tomax! —nhanagürügü. ¹²Rü poraãcū naxauxe ga guma ãanecüãx, yerü yema tama yuxū rü guxūwama nataixnaxūnegü.

**Firitéutanūxūgū rü nanatæguxēēgū
ga yema baú ga Tupanaarū
mugūchixū**

6 ¹Rü yema baú ga Tupanaarū mugūchixū rü 7 ga tauemacü Firitéutanūxūgüarü naanewa nayexma. ²Rü nūma ga Firitéutanūxūgū rü nanangutaquexexēxē ga norü chacherdótegü rü yuũxūgū nax yemagiuna nacagüexūcax, rü nhanagürügü: —¿Taxacü tá namaxã taxūxū i ngēma Iraéuanecüãxgüarü Tupanaarū mugūchixū? ¡Tomaxã nüxū pexu nax nhuxãcū tá wena nachixūãanecax tanatæguxēēxū!

—nhanagürügü. ³Rü nūma ga yema chacherdótegü rü yuũxūgū rü nanangãxūgagü, rü nhanagürügü: —Ngëxguma penatæguxēēgü i ngēma baú i Iraéuanecüãxgüarü Tupanaarū mugūchixū, rü ¡taxūtama ngēmaãcumare penatæguxēxē! Rü name nixĩ nax nüxna penaxãxū i wüxi i ãmare nax ngēmaãcü Iraéuanecüãxgüarü Tupanaxū namaxã perüngüxmüxēēxū. Rü ngëxguma i pema rü tá pexcax nitaanegü rü tá nüxū pecuaxächitanü nax ngëmagagu yixĩxū i Tupana i pexū yadaaxaweexēēxū —nhanagürügü. ⁴Rü nūma ga duũxūgū rü yema chacherdótegüna rü yuũxūgüna nacagüe, rü nhanagürügü nüxū: —¿Taxacü tá nixĩ i nüxna taxãmarexū nax namaxã tanangüxmüxēēxūcax? —nhanagürügü. Rü nūmagü ga chacherdótegü rü yuũxūgū nanangãxūgü rü nhanagürügü: —Penaxwaxe i penaxü i 5 i naxchicünaxägü i úirunaxcax i nataixnapüxügüraxūxū. Rü ngēma naxchicünaxägü rü ngēma 5 i perü ãëxgacügüexpüx tá nixĩ i penaxūxū. Rü nhuxūchi 5 i ücachicünaxã i úirunaxcax tá pexü. Erü ngēma taixnagümaxã nixĩ i Tupana i pexü yadaaxaweexēēxū, rü ücagümaxã nixĩ i guxchaxū pexna naxãxū i guxāma i pemax rü perü ãëxgacügü. ⁵Rü ngëmacax name nixĩ i ípenaxūxū i ngēma taixnaxchicünaxägü rü naxchicünaxägü i ngēma ücagü i guxchaxū pexna ãxū i perü ãanewa. ¡Rü nüxū pecuaxūxū ya yimá Iraéuanecüãxgüarü Tupana! Rü bexmana ngēmaãcü tá nüxū narüchau nax pexū yadaaxaweexēēxū, rü pexū

napoxcuxê i pemax rü perü tupanagü rü perü naanegü. ⁶ ;Rü tüxcüü pegü ípenataiächiarü maxüâxgü narüxü ga yema Eyítuanecüâxgü rü norü âêxgacü ga Faraóú? Yerü yexguma Tupana düxwa guxchaxü naxçax ínguxêéguxicatama nixí ga Iraéutanüxügüxü yangexgüxü. ⁷ ;Rü ngexwacaxüne ya peweü ya ächicune pexüx! ;Rü yima peweü rü taxre i woca i äxacüxü rü taguma üpaacu nhuxgu taxacu i tügüxüwa peyangaxcuchix! Notürü ngéma naxacügü ;rü naxpüügu namaxâ penguxü nax tama naéwe nangégüxüçax! ⁸ ;Rü nhüxmachi yima peweügu peyaxúe i ngéma baú i Cori ya Tupanaarü mugü nawa ngëxmaxü! ;Rü ngéma baúcüwagu peyaxúechixü i ngéma naxchicünaxägü i úirunaxçax ixügüxü i norü Tupanaarü ngüxmüxêêruxü ixüxü! ;Rü ngémawena rü peyangexgü i ngéma wocagü nax nüma ínanaxwaxexüwa naxixüçax namaxâ i ngéma baú! ⁹ ;Rü pema rü mea tá penangugü rü ngextáama naxí i ngéma wocagü namaxâ i ngéma baú. Rü ngëxguma Iraéuanecüâxgüarü naanewaama naxixgu i Becheméwaama, rü ngémawa tá nüxü tacuax nax yimá Iraéuanecüâxgüarü Tupana yixixü i taxçax ínanguxêêxü i ngéma dâxaweane. Notürü ngëxguma tama ngémaama naxixgu rü ngémawa tá nüxü tacuax nax tama Iraéuanecüâxgüarü Tupana yixixü ga tüxü poxcucü rü woetama ngéma taxçax ínangumare —nhanagürügü. ¹⁰ ;Rü yemaacü nanaxügü ga yema yatügü. Rü taxre ga woca ga ixâxacüxü niyaxgü rü tûmapüügu tüxü nawocu ga guxema

naxacügü. Rü yemawena ga yema wocagü rü guma naweüwa nayangacuchigü. ¹¹ ;Rü nhüxmachi guma naweügu nayaxüegü ga yema baú ga Cori ya Tupanaarü mugü nawa yexmaxü. Rü yexma nayaxüechixügü ta ga yema ücachicünaxägü ga úirunaxçax, rü yema taixnachicünaxägü. ¹² ;Rü yemawena ga yema wocagü rü íane ga Becheméwa nadaxü ga namagu naxí, rü nixáietanü, rü wexgu naxí rü taxuwama ínachocu. Rü nüma ga Firitéutanüxügüarü âêxgacügü rü naweama nixixütanü nhüxmata Becheméarü üyeaneawa nangugü. ¹³ ;Rü yema duüxügü ga Bechemécüâxgü ga naanegüwa tríguarü buxuwa puracüexü, rü yexguma nüxü nadaugügu ga yema baú ga Cori ya Tupanaarü mugü nawa yexmaxü, rü nataâxégü. ¹⁴ ;Rü yexguma Yuchuéarü naanewa nanguxgu ga Becheméwa, rü yéma nayachaxâchi. Rü yéma nayexma ga wüxi ga nuta ga tacü. Rü nüma ga Bechemécüâxgü ga duüxügü rü nagu napogüe ga guma naweü rü üxüxü nayaxixêégü. Rü ga yema wocagü rü Tupanaçax nanadai rü ínanagu. ¹⁵ ;Rü nümagü ga Lewítanüxü rü marü ínanaxüegü ga yema baú ga Tupanaarü mugüchixü rü yema caichaü ga nawa nayexmagüxü ga yema ücachicünaxägü, rü yema úirupüxügü ga nataixnapüxügüraxüxü. Rü guma nuta ga tacüétügu nananugü. Rü yema ngunexügu ga yema Bechemécüâxgü rü Cori ya Tupanaçax ínanagu ga naxünagü rü muxüma ga togü ga norü ämaregü. ¹⁶ ;Rü nüma ga yema 5 ga âêxgacügü ga Firitéutanüxügü rü yáxüwa nüxü narüdaunü. Rü yexguma

marü nüxũ nadaugügu ga marü
Iraéuanecüãxgümexêwa nax nanguxũ ga
yema baú, rü yemawena rü Ecróũcax
nawoegu ga yematama ngunexũgu.
17Rü yema 5 ga taixnachicünaxãgü ga
úirunaxcax ga Firitéutanüxũgü Cori ya
Tupana naxuaxũgüxũ norü
ngüxmüxêêruxũ, rü yema rü guma
ãanegü ga Asdóde, rü Gácha, rü Acarúũ,
rü Gáyí, rü Ecróũarü ãmaregü nixĩ.

.....

19Notürü nüma ga Cori ya Tupana rü
nanadai ga nhuxre ga duũxũgü ga
Bechemécüãxgü yerü yema Tupanaarü
mugüchixũ ga baúgu nadacu. Rü 70 ga
yatügü nixĩ ga yuexũ. Rü nüma ga yema
ãanecüãxgü rü poraãcũxüchima naxaxe
naxcax ga yema duũxũgü ga Cori ya
Tupana natanüwa daixũ. 20Rü yemacax
ga nüma ga Bechemécüãxgü rü
nhanagürügü: —¿Texé tame nax Cori ya
Tupana ya üüncüpexegu tachixũ? ¿Rü
ngextá tá ínamuxũ i ngêma baú i
nhuxmax? —nhanagürügü. 21Rü
yemacax ãane ga
Quiriáte-Yearíücüãxgücax yéma
namugagü rü nhanagürügü: —Ngêma
Firitéutanüxũgü rü marü nanatæguxêêgü
i ngêma baú i Cori ya Tupanaarü
mugüchixũ. Rü ngêmacax name i nua
pexĩ rü peyayaxu —nhanagürügü.

7 1Rü nüma ga
Quiriáte-Yearíücüãxgü rü
Becheméwa nayayauxgü ga yema baú
ga Cori ya Tupanaarü mugüchixũ. Rü
norü ãanewa nanangegü rü
nayaxúcuchigü napatagu ga Abinadábi
ga wüxi ga maxpúnegu áchiücü. Rü
nane ga Ereacháxũ naxunetagu nax
nüxna nadauxũcax.

Chamué rü Iraéuanecüãxgümaxã inacuax

2Rü 20 ga taunecü ningu ga yema
Tupanaarü mugüchixũ ga ãane ga
Quiriáte-Yearíüwa nax nayexmaxũ. Rü
guxũma ga Iraéuanecüãxgü rü poraãcü
nangechaũgü yerü nüma nagu
naxĩnüegu rü nüma ga Cori ya Tupana
rü marü ínanawogü. 3Rü yemacax nüma
ga Chamué rü guxũma ga yema
Iraéuanecüãxgüxũ nhanagürü:
—Ngêxguma pema rü aixcuma Cori ya
Tupana pexoeguxgux, rü name nixĩ i
ípenawogü i guxũma i ngêma
tupananetagu ixigüxũ, rü ngêma
tupananeta i Atarúchichicünaxã. Rü
penaxwaxegü i Cori ya
Tupana guxicatama perüxĩnüe rü nüxũ
pecuaxüxgü. Rü ngêxguma ngêmaãcü
penaxüxgux, rü nüma ya Tupana rü tá
pexũ ínanguxüxêê naxmexwa i ngêma
Firitéutanüxũgü —nhanagürü. 4Rü
nüma ga Iraéuanecüãxgü rü ínanawogü
ga naguxüraxüãcü üxũ ga
Baáchicünaxãgü rü
Atarúchichicünaxãgü. Rü Cori ya
Tupana guxicatama nicuaxüxgü. 5Rü
yemawena ga Chamué rü
Iraéuanecüãxgüxũ nhanagürü: —¿ãane
ya Míspagu pengutaquexegü i guxãma i
pemax i Iraéuanecüãxgü! Rü ngêma tá
nixĩ i peétüwa nüxna chachogüxũ ya
Tupana —nhanagürü. 6Rü nüma ga
Iraéuanecüãxgü rü Míspagu
nangutaquexegü. Rü yéma puchuwa
dexáta nayauxgü, rü Cori ya
Tupana pexegu nanabagü norü
ãmareruxũ. Rü yema ga ngunexũgu rü
naxauree rü tama nachibüe. Rü guxũma

ga duũxũgũ rü nüxũ nixugüe nax chixexũ naxügüxũ ga Tupanapexewa. Rü yéma Míspawa nixĩ ga Chamué ga inaxügüãxũ ga Iraéuanecüãxgümaxã inacuíxũ.

.....

¹⁵Rü yexguma namaxũxgu ga Chamué rü Iraéuanecüãxgümaxã inacua. ¹⁶Rü gucüma ga taunecügu rü ñanegü ga Betéuwa rü Yigáwa rü Míspawa naxũxũ nax yema Iraéuanecüãxgüxũ yanangũxêxũcax nax nhuxãcü inawexãchixêãxũcax ga norü guxchaxũgü. ¹⁷Rü nhuxmachĩ norü ñane ga Ramácax natáeguuxũ, yerü yexma nixĩ ga naxãchiũxũ. Rü yéma nixĩ ga Iraéuanecüãxgümaxã inacuíxũ. Rü yexma nanaxü ga Cori ya Tupanaarü cuaxüxũchica ga nawa naxũnagü yaguxũ.

**Iraéuanecüãxgü rü nanaxwaxegü
nax nüxũ nangexmaxũ ya wüxi ya
ãëxgacü ya réi**

8 ¹Rü yexguma marü nayaxgu ga Chamué, rü nanegüxũ naxuneta nax Iraéuanecüãxgümaxã inacua. ²Rü guma nüxĩraxũcü ga nane rü Yoéugu naxãéga. Rü guma norü taxre ga nane rü Abíagu naxãéga. Rü Bechébawa nixĩ ga ãëxgacü yixĩgüxũ. ³Notürü tama nanatürüxũ nixĩgü, yerü norü yemaxũgüguama narüxĩnue. Rü yexguma taxacürü guxchaxũ namexêëgügu rü nanayauxtanügü, rü tama aixcuma mea guxüma ga duũxũgüxũ narüngüxêë. ⁴Rü düxwa ga Iraéuanecüãxgüarü ãëxgacügü rü nügümaxã nangutaquexegü, rü ñane ga Ramáwa naxĩ nax Chamuéxũ

íyadaugüxũcax. ⁵Rü Chamuéxũ nhanagürügü: —Cuma rü marü cuya, rü cunegü rü tama cuxrũxũ mea namaxê. Rü ngëmacax ;nüxũ naxuneta i wüxi i torü ãëxgacü i réi nax tomaxã inacuíxũcax ngëxgumarüxũ i ngëma togü i nachixũanegü nax nüxũ nangexmaxũ i norü ãëxgacü i réi! —nhanagürügü. ⁶Rü yexguma ga nüma ga Chamué rü tama namaxã nataãxê yerü yema duũxũgü rü nanaxwaxegü nax nüxũ nangexmaxũ ya wüxi ya ãëxgacü ya réi nax namaxã inacuíxũcax. Rü yemacax Tupanamaxã nüxũ nixu norü yumüxêwa. ⁷Notürü nüma ga Cori ya Tupana rü Chamuéxũ nangãxüga rü nhanagürü: —;Ëcü naxü i ngëma cuxna naxcax nacagüxũ! Erü tama cuxũ nixĩ i naxooxgüxũ, rü choxũwaxi nixĩ, erü tama nanaxwaxegü i norü ãëxgacü nax chixixũ. ⁸Rü yexguma Eyítuanewa íchangüxũxêëxgucürüwa nixĩ ga choxna yaxĩgachixũ nax tupananetawe nax naxĩxũcax. Rü ngëmatama nixĩ i nhuxmax cumaxã naxügüxũ. ⁹;Ëcü naxü i ngëma naxcax ínacagüxũ! ;Notürü mea namaxã nüxũ ixu i ngëma duũxũgü i nhuxãcü tá ya namaxã naporae ega nangexmagu ya wüxi ya norü ãëxgacü ya réi poraãcü namuxũ! —nhanagürü. ¹⁰Rü nüma ga Chamué rü yema duũxũgümaxã nüxũ nixu ga yema Tupana namaxã nüxũ ixuxũ. ¹¹Rü nhanagürü nüxũ: —Ngëxguma penaxwaxegu nax pexũ nangexmaxũ i perü ãëxgacü i réi rü nhaãcü tá nixĩ i pemaxã inacuíxũ i ngëma ãëxgacü: Rü tümacax tá naca ya penegü nax churaragü tixĩgüxũcax, rü tümãxegü rü churaragü i naweũ ya dairüũmaxã

icuaḡgüxũ nax tixĩgüxũcaḡ, rü tümáxegü rü cowarugü i dairuũmaxã icuaḡgüxũ nax tixĩgüxũcaḡ, rü tümáxegü rü churaragü i noxrütama daruũgü nax tixĩgüxũcaḡ. ¹²Rü ngëxgumarüxũ tá ta tüxũ naxuneta ya toguxegü nax 1000 i churaragüarü äëxgacü nax tixĩgüxũcaḡ, rü toguxegü nax 50 i churaragüarü äëxgacü nax tixĩgüxũcaḡ. Rü pemagü, rü ngëma äëxgacü rü tümáxegü rü tá norü naanearü aimüanewa tüxũ napuracüexëxë, rü toguxe rü tá norü nanetüarü buxgüwa tüxũ napuracüexëxë, rü toguxe rü tá naxnegüarü üwa tüxũ napuracüexëxë, rü toguxe rü tá naweũ ya dairuũarü üwa tüxũ napuracüexëxë. ¹³Rü tá tüxũ nade ya pexacügü nax nüxũ taxüwemügüxũcaḡ, rü norü poũarü üwa nax tapuracüexũcaḡ, rü norü pumára nax taxügüxũcaḡ. ¹⁴Rü nügüxũ tá nanayaxu i ngëma naanegü irümemaegüxũ, rü ngëma rümemaegüxũ i perü úwanecü rü oríwanecü, rü nhüxüchi ngëma äëxgacügü i natüüwa ügüxũna tá nanana. ¹⁵Rü ngëma 10 wetaxũ i perü tríguwa rü perü úwawa, rü ngëma äëxgacü tá pexna nanayaxu i wüxiwetaxũ, rü nhüxüchi ngëma äëxgacügü i natüüwa ügüxũna tá nanana. ¹⁶Rü ngëxgumarüxũ tá ta pexna tüxũ napuxũ ya yíxema duëxëgü ya pexũ puracüexe rü yíxema pexütaxũgü. Rü ngëma rümemaexũ i perü woca i puracüruũgü, rü búrugü, rü tá pexna nanade nax nügüxũ napuracüexëäxũcaḡ. ¹⁷Rü ngëma 10 i perü carnérugüwa rü tá pexna nanayaxu i wüxi nax noxrüxũ yixĩxũcaḡ. Rü pema tátama nixĩ i nhüxmachi nüxũ

pepuracüexũ. ¹⁸Rü ngëma i ngunexũgu i namaxã pechixeäëgügu i ngëma äëxgacü i nhüxmax naxcaḡ ípecagüxũ rü nüma ya Cori ya Tupana rü marü taxütama pexũ nacuaíxchaũ —nhanagürü ga Chamué. ¹⁹⁻²⁰Notürü nüma ga yema duüxũgü, rü tama inarüxĩnuechaũ ga yema Chamué namaxã nüxũ ixuxũ. Rü nhanagürügüama: —Nüétama, rü tanaxwaxegü i toxũ nangexma ya wüxi ya äëxgacü ya réi nax ngëma togü i nachixũanerüxũ tixĩgüxũcaḡ. Rü nüma tá nixĩ i tórü äëxgacü yixixũ, rü tá tomaxã inacuaíx ega ngëxguma togümaxã togü tadaixgux —nhanagürügüama. ²¹Rü yexguma yema duüxũgügaxũ naxĩnügüwena ga Chamué, rü Cori ya Tupanamaxã nüxũ nixu ga yema duüxũgüga. ²²Rü nüma ga Cori ya Tupana rü Chamuéxũ nangãxũga rü nhanagürü: —¡Naxü i ngëma naxcaḡ ínacagüxũ rü nüxũ naxuneta ya wüxi ya norü äëxgacü ya réi! —nhanagürü. Rü yexguma nüma ga Chamué rü yema Iraéuanecüäxgüxũ namu nax norü íanegücaḡ nawoeguxũ.

Chau rü Chamuéxütawa nangu

9 ¹Rü Bëyamítanüxüwa nayexma ga wüxi ga yatü ga Quíchigu äëgacü. Rü nüma rü Abié nane nixĩ rü Cherótaxa nixĩ. Rü guxema toguxe ga norü oxĩ rü Becoráchi ga Afia nane tixĩ. Rü nüma ga Quíchi rü wüxi ga yatü ga guxãma nüxũ ngechaücü nixĩ. ²Rü nüma rü nüxũ nayexma ga wüxi ga nane ga ngextüxücü ga guxüwama mexechicü ga Chaúgu äëgacü. Rü guxüma ga yatüxũ ga Iraéuanecüäxgüarü yexera namexechi,

rü norü máchanewa rü taxúema nüxü tangupetü ga naatüwa. ³Rü wüxi ga ngunexügu rü Quíchiarü búrugü rü inarütaxe. Rü yemaçax nane ga Chaúxü nhanagürü: —¡Cugü namexëxë rü naxçax yadau i ngëma búrugü! ¡Rü wüxi i tórü duüxümaxã íxãmücü! —nhanagürü. ⁴Rü nüma ga Chaú rü inaxüãchi. Rü Efraíarü naanearü máxpüxanaxüwa nixüpetü, rü nhüxüchi Charicháarü naanewa rü ta naxüpetü, notürü tama nüxü inayangau ga norü búrugü. Rü yexgumarüxü ta Charfúarü naanewa rü Bëyamíarü naanewa naxüpetü, notürü yéma rü ta taxuxüma inayangau. ⁵Rü yexguma Chúfe naanewa nanguxgu, rü nüma ga Chaú rü guxema norü duüxë ga íyaxümcüxexü nhanagürü: —¡Ngíxã tawoegu! Rü nhüxcü ya chorü papá rü ngëma búrugüçax nax taxoégaãxüarü yexera taxçax taxoégaãxë —nhanagürü. ⁶Rü nüma ga yema norü duüxü rü nanangãxüga rü nhanagürü: —Daa íanewa nangexma i wüxi i Tupanaarü orearü uruxü i guxãma nüxü ngechaügüxü, erü guxüma i nüxü yaxuxü rü ngëmaãcü ningü. ¡Rü ngíxã naxütawa taxí! Rü nüma tá tamaxã nüxü nixu nax ngextá nangexmagüxü i ngëma búrugü —nhanagürü.

.....

¹⁴Rü yexguma ga Chaú rü yema duüxümaxã guma íanecax nixíama. Rü yexguma guma íanewa nangugügu, rü nüma ga Chamué rü yéma ne naxü ga ngutaquexepataüwa nax naxüxüçax.

.....

¹⁷Rü yexguma Chaúxü nadaxgux ga Chamué, rü nüma ga Cori ya Tupana rü

nhanagürü nüxü: —Ngëma nixí i ngëma yatü i cumaxã nüxü chixuxü, rü nüma tá nixí i chorü duüxügümaxã inacuáxü —nhanagürü. ¹⁸Rü yexguma guma íanearü ücuchicawa nayexmagügu, rü nüma ga Chaú rü Chamuéçax nixü rü nhanagürü: —¡Tomaxã nüxü ixu rü ngexta nixí i napexü ya yimá Tupanaarü orearü uruxü! —nhanagürü. ¹⁹Rü nüma ga Chamué rü nanangãxüga rü nhanagürü: —Chama nixí i orearü uruxü chixixü. ¡Rü ngíxã chawe rüxü i ngutaquexepataüwa, rü chauxütawa yachibü! Rü moxü paçmama tá cumaxã nüxü chixu i guxüma i ngëma choxna naxçax cucaxaxü, rü nhüxmachi tá cuxü íchimu. ²⁰¡Rü tauxü i naxçax cuxoégaãxü i ngëma búrugü i tamaepüx i ngunexü marü iyarütaxe! Erü marü nüxü inayangaugü. Rü naétü rü guxüma i Iraéuanearü ngëmaxügü rü cuxmexwa nangexma i nhüxmax —nhanagürü. ²¹Rü nüma ga Chaú rü nanangãxüga rü nhanagürü: —Notürü i chama rü Bëyamítanüxü chixí, rü ngëma totücumü rü guxüma i togü i Iraéuanecüãxgütücumüxü narünoxremae. Rü nhüxmachi ngëma nügütanüxüchigü i Bëyamítücumüwa ügüxü, rü chautanüxü nixí i guxüarü yexera taxúema nagu rüxünüxü. Rü ngëmacax çtüxcüü chamaxã nüxü quixu nax guxüma i Iraéuanearü ngëmaxügü rü çaxmexwa nangexmaxü? —nhanagürü. ²²Rü yemawena ga Chamué rü chibüchicawa nanagagü ga Chaú rü norü duüxü. Rü yema rümemaxü ga nachicawa nanatogüxëxë natanüwa ga yema 30 ga duüxügü ga nüxna naxuxü. ²³Rü nüma ga Chamué

rü yema üwemüxüxü namu nax Chaúna naxãxüçax ga yema rümemaexü ga namachi ga woetama naxçax ínaxüxüchixü. ²⁴Rü yexgumatama ga yema üwemüruxü rü wüxi ga naperema ga mexüne nayaxu rü Chaúpexegu nayaxú. Rü nüma ga Chamué rü Chaúxü nhanagürü: —Ngëma nixí i woetama cuxú íchaxüxüchixü. ¡Rü nayaxu rü nangõx! Erü woetama cuxú íchanaxüxüchi naxüpa ga nhaa duüxügüna nax chaxuxü —nhanagürü. Rü nüma ga Chaú rü Chamuémaxã nachibü ga yema ngunexügu. ²⁵Rü yexguma marü Tupanapatawa ínachoxügu ga íanewa nax naxixü, rü ípataarü dauxüwa Chaúçax nanamexëégü ga wüxi ga pechica. ²⁶Rü nüma ga Chaú rü yexma nape. Rü moxüãcü nüma ga Chamué rü Chaúxü naca ga ípataarü dauxnawa, rü nhanagürü nüxü: —¡Írúda rü marü name nax íquixüxü! —nhanagürü. Rü nüma ga Chaú rü ínariüda. Rü yemawena rü ínachoxü ga Chaú rü Chamué, rü namawa naxí. ²⁷Rü yexguma marü guma íanewa ínachoxügu, rü nüma ga Chamué rü Chaúxü nhanagürü: —¡Ëcü cugüpexe yamu i ngëma curü duüxü, rü cuma rü paxaãchi nuxã rüxãüx! Erü cumaxã nüxü chixuxchaü i ngëma ore i Tupana chamaxã nüxü ixuxü —nhanagürü.

**Chamué rü chíxümaxã Chaúxü
nabaeru nax Iraéuanecüãxgüarü
ãëxgacü yixixüçax**

10 ¹Rü yexguma ga nüma ga Chamué rü wüxiwexü ga chíxü nayaxu, rü Chaúxü namaxã nabaeru, rü

nhanagürü nüxü: —Cori ya Tupana cuxü nayaxu nax norü duüxügü i Iraéuanecüãxgüarü ãëxgacü i réi nax quixixüçax i nhuxmax. Rü cuma tá namaxã icucuçax rü norü uanügü i nüxü íchomaeguãchixüwa tá ícunapoxü. Rü ngëma cuaxruxü i nawa nüxü cucuáxü nax aixcuma Cori ya Tupana cuxü unetaxü nax norü duüxügü i Iraéuanecüãxgüarü ãëxgacü nax quixixü, rü nhaãcü tá nixí: ²Rü nhuxmax nax choxna íquixüxü rü Bëyamíarü naanewa i Chéchawa tá nüxü icuyangau i taxre i yatügü i Raquéuchiquexearü ngaicamagu chigüxü. Rü nümagü tá cumaxã nüxü nixügü: “Rü marü nüxü nax iyangauxü i ngëma búrugü i naxçax cudauxü. Rü túma ya cunatü rü marü tama naxçax taxoégaãe i ngëma búrugü, notürü pexçax nixí i taxoégaãëxü i nhuxmax, rü nagu tarüxínüxü nax nhuxãcü tá pexü itayangauxü”, nhanagürügü tá cumaxã. ³Rü ngëma nax cuxüpetüxü rü ngëxguma Tabúarü carabáyu íngexmaxüwa cunguxgu, rü tá ngëxma pegü namaxã peyangaugü i tamaepüx ya yatü i Betéuwa íxü nax Tupanaxü yanacuaxüügüxüçax. Rü ngëma wüxi rü tamaepüx i bóyi niga, rü ngëma to rü tamaepüx i poü ninge, rü ngëma to rü wüxipüxüwexü ya wüfú ninge. ⁴Rü nümagü rü tá cuxü narümoxëgü, rü tá cumaxã nangau i taxre i poü. Rü name nixí i nüxü cunayaxu. ⁵Rü ngëmawena rü tá Yibéa ya Tupanaarü Mäxpúnegu ãéganewa cingu i Firitéutanüxügüarü dauxütaechica íngexmaxüwa. Rü ngëxguma yima íanewa pichocuxgux, rü ngëxma tá nüxü cungau i nhuxre i

Tupanaarü orearü uruüügü i Tupanaãxê i Üünexũ namaxã icuáxũ i Tupanaarü cuaxüxũwa ne ïxũ. Rü ngëmapexegu tá naxí i duüxüügü i paxetaetanüxü i norü árpamaxã, rü árpaxacümaxã, rü pädërumaxã rü wowerumaxã. ⁶Rü ngëxguma tátama cuxna nangu i Tupanaãxê i Üünexũ, rü tá cumaxã inacux narüxũ i ngëma togü i Tupanaarü orearü uruüügü. Rü tá Tupanaarü oremaxã quidexa rü to i ïnü tá cuxü nangexma. ⁷Rü ngëxguma ngëma cuxü ngupetüxgu jrü naxü i ngëma cuxçax mexü! Rü Tupana tá cuxü narüngüxêê nax ngëma cuxüxũ. ⁸jRü nhüxüchi Yigáwa naxü! jRü 7 i ngunexü ngëma choxü rünguxêê! Erü ngëma tá chaxü nax ngëma Cori ya Tupanaçax naxüna íchayaguxüçax, rü ãmaregü nüxna chayanaxüçax nax nangüxmüxüçax. Rü ngëma tá nixí i cumaxã nüxü chixuxü nax taxacü tá cuxüxũ —nhanagürü. ⁹Rü nüma ga Chaú rü Chamuéxũ narümoxê nax íyaxüxüçax. Rü yemawena rü Tupana rü ngexwacaxüxü ga ïnü nüxna naxã. Rü guxüma ga yema ore ga Chamué namaxã nüxü ixuxü, rü ningu ga yema ngunexüügu. ¹⁰Rü yexguma Chaú rü yema norü duüxümaxã Yibéawa nangugügu, rü nüxü nadaugü ga yema orearü uruüügü ga yexma nügü namaxã yangaüxü. Rü Tupanaãxê rü Chaúna nangu, rü nüma rü ta inanaxügü ga Tupanaarü oremaxã nax yadexaxü.

¹³Rü yexguma Chaúna iyachüxüächigu ga Tupanaãxê ga yadexaxêxü, rü nüma ga Chaú rü nawa nangu ga guma maçpúne ga Tupanaarü

cuaxüxüchica. ¹⁴Rü nanepü rü nüxna naca rü nhanagürü: —¿Ngextá nixí ga pexüxü? —nhanagürü. Rü nüma ga Chaú rü nanangãxü rü nhanagürü: —Naxçax tayadaugü ga yema búrugü. Notürü yexguma tama nüxü itayangaugügu rü Chamuéxütawa ítayadaugü —nhanagürü. ¹⁵Rü nüma ga nanepü rü nüxna nacaama rü nhanagürü: —¿Rü nhuxü nhaxü pexü ga Chamué? jRü mea chamaxã nüxü ixu! —nhanagürü. ¹⁶Rü nüma ga Chaú rü nanepüxü nangãxüga rü nhanagürü: —Meama tomaxã nüxü nixu ga marü nüxü nax iyangaüxgüxü ga búrugü —nhanagürü. Notürü tama nüxü nixu ga Chamué nax chíxümaxã nabáeruxü nax Iraéuanecüãxgüarü ãëxgacü i réi yixüçax. ¹⁷Rü yemawena ga Chamué rü Iraéuanecüãxgüçax nangema nax Míspawa naxixüçax rü yéma Cori ya Tupanaxü yanacuaxüüügüxüçax. ¹⁸Rü yexguma yéma nangugügu rü nüma ga Chamué rü yema Iraéuanecüãxgüxü nhanagürü: —Nüma ya Cori ya tórü Tupana rü nhanagürü: “Chama nixí ga Eyítuanewa pexü íchagaxüxü, Pa Iraéuanecüãxgüx. Rü chama nixí ga naxmexwa pexü íchanguxüxêxü ga yema Eyítuanecüãxgü rü guxüma ga yema togü ga ãëxgacügu ga pexü chixeãxêgüxü. ¹⁹Notürü i nhüxmax i pemax rü nüxü pexo ya yimá perü Tupana ga guxüma ga perü guxchaxügüwa rü perü íxächíãëgüwa pexü ínguxüxêëcü. Rü ngëmacax wüxi i perü ãëxgacü i réicax ípeca nax pemaxã inacüxüçax. Rü ngëmacax i nhüxmax rü Cori ya Tupanaçaxewa ípengugü ga wüxíticümüchigü rü tügütanüxüchigü”

—nhanagürü. ²⁰Rü yemawena ga nüma ga Chamué rü guxüma ga Iraéuanecüâxgütücumüçax naca nax naxütägu nangutaquexegüxüçax nax naxçax nadaugüxüçax ga ngexürüüxütücumüwa tá ne naxüxü ga norü âëxgacü. Rü Bëyamítücumügu nangu. ²¹Rü yexguma ga Chamué rü Bëyamítücumüçax naca nax naxütawa naxüxüçax, rü yema Bëyamítücumüwa rü Matítanüxügu nangu. Rü yematanüwa rü Chau ga guma Quíchi nane ixícügu nangu nax Iraéuanecüâxgüarü âëxgacü yixüxü. Notürü yexguma naxçax nadaugügu ga Chau, rü tama nüxü inayangaugü. ²²Rü yemaçax wenaxarü Cori ya Tupanana nacagüe ga nüxü nax nacuaxgüxüçax ngoxi nayexma ga Chau. Rü nüma ga Cori ya Tupana rü nüxü nixu ga yéma nax nayexmaxü, rü Iraéuanecüâxgüarü yemaxütanügu nax yacüxü. ²³Rü yexgumatama naxçax nayadaugü rü nayagagü ga yema íyacüxüwa. Rü nüma ga Chau ga yexguma duüxügüpeçewa nanguxgu, rü nüxü nadaugü ga Iraéuanecüâxgütanüwa rü taxüema naatüxü ngupetüxü ga tümaarü máchanewa. ²⁴Rü nüma ga Chamué rü guxãna naca rü nhanagürü: —¿Marü nüxü pedauxü ya yimá Cori ya Tupana nüxü unetacü nax perü âëxgacü i réi yixüxüçax? Rü nataxuma i wüxi i Iraéuanecüâx i namaxã wüxigüxü —nhanagürü. Rü nüma ga duüxügü rü: —¡Namaxüx ya tórü âëxgacü ya réi! —nhaxümaxã nanangãxügagüama. ²⁵Rü yexguma ga nüma ga Chamué rü duüxügümaxã nüxü nixu ga yema mugü ga nagu tá yaxüxü ga gumá âëxgacü

norü duüxügümaxã. Rü nhuxüchi wüxi ga poperagu nanaxümatü ga yema mugü rü Tupanapatagu nayaxü. Rü yemawena ga Chamué rü ínayamugü ga guxüma ga yema Iraéuanecüâxgü nax napatawa naxüxüçax. ²⁶Rü yexguma ga nüma ga Chau rü nachüçax natáegu ga Yibéawa. Rü nawe narüxü ga nhuxre ga yatü ga daiwa imexü ga Cori ya Tupana norü maxügu ingógügüxü nax íyaxümücügüâxüçax. ²⁷Notürü nayexmagü ta ga duüxü ga Chaúmaxã chixexügu rüxínüexü rü nhagüxü: —¿Nhuxãcü tá i nhaa yatü i tamaxã inacuáxü? —nhagüxü. Rü yemaacü nüxü naxooçgü rü tama namaxã nataãxëgü. Notürü nüma ga Chau rü tama yemagu narüxínü.

Chau rü Amóütanüxügüxü narüporamae

11 ¹Rü nüma ga Amóütanüxügüarü âëxgacü ga Naá rü norü churaragüxü nangutaquexexë nax yadaiacuãxüçax ga Iraéuanecüâxgüarü íane ga Yabé ga Yibéanewa yexmane. Notürü ga yema duüxügü ga Yabécüâxgü rü nhanagürügü: —¡Tomaxã naxü i wüxi i üga, rü ngëxguma tá nixü i cuxmexwa togü tangexmagüxëxü! —nhanagürügü. ²Rü nüma ga Amóütanüxügüarü âëxgacü ga Naá rü nanangãxü rü nhanagürü: —Marü name i pemaxã ichaxüga ega chi pexü namexgu nax perü tügünexetü chayaxuxü i wüxichigü i pema nax ngëmaacü wüxi i cugüruxü pexügüxüçax i guxãma i pema i Iraéuanecüâxgü —nhanagürü. ³Rü nüma ga Yabéarü âëxgacügü rü

nanangãxũgũ rü nhanagürügũ:
 —¡Toxna naxã i 7 i ngunexũ nax naxçax
 tadauxũçax i ngũxêê i totanũxũ i
 Iraéuanegütanüwa! Rũ ngëxguma chi
 nataxuguma i toeneegũ i toxũ
 rüngũxêêxũ, rü marũ name i tomaxã
 cunaxũ i ngëma cuma nagu curũxĩnũxũ
 —nhanagürügũ. ⁴Rũ nhuxre ga yema
 Yabécũãx rü guma ñane ga Yibéa ga
 Chaú nawa yexmanewa nanangegũ ga
 yema ore. Rũ duũxũgũmaxã nüxũ
 nixugüe ga yema Yabéwa ngupetũxũ.
 Rũ yexguma nüxũ naxĩnüegu rü guxũma
 ga duũxũgũ rü poraãcü naxauxe. ⁵Rũ
 nüma ga Chaú rü naanewa ne naxũ
 namaxã ga norũ wocagũ ga puracürũxũ.
 Rũ norũ duũxũgũna naca rü nhanagürü:
 —¿Taxacũ nüxũ nangupetũ i duũxũgũ?
 ¿Taxacũçax naxauxe? —nhanagürü. Rũ
 nüma ga norũ duũxũgũ rü Chaúmaxã
 nüxũ nixugüe ga yema ore ga yatügũ ga
 Yabécũãx yéma ngegũxũ. ⁶Rũ yexguma
 yema orexũ naxĩnügu ga Chaú, rü
 Tupanaãxê nüxna nangu rü poraãcü
 nanu ga Chaú. ⁷Rũ yexguma ga Chaú rü
 taxre ga woca niyaxu rü ägũmücũgu
 tegũ nanachex. Rũ nhũxũchi nhuxre ga
 orearũ ngeruũgũmaxã guxũ ga
 Iraéuanecũãxgütanüwa nanamu ga
 yema namachigũ. Rũ yema orearũ
 ngeruũgũ rü nhaa orexũ nixuetanü:
 —Nhaatátama túmaarũ wocamaxã taxũ
 ya yíxema tama Chaúwe rü Chamuéwe
 rüxũxchaũxe —nhanagürügũ. Rũ nüma
 ga duũxũgũ rü poraãcü namuñe rü
 nhama wüxitama ga yatürũxũ inaxĩãchi,
 rü Chaúwe rü Chamuéwe narüxĩ. ⁸Rũ
 yexguma Bechéwa Chaú yaxugũxgu ga
 norũ duũxũgũ ga yexma
 ngutaquexegũxũ, rü nayexma ga

300,000 ga yatügũ ga Iraéuanecũãxgũ
 rü naétũ 30,000 ga Yudáanewa ne ñxũ.
⁹Rũ yemawena rü yema duũxũgũ ga
 Yabécũãxgũ ga orearũ ngeruũgũxũ
 nhanagürü: —¡Namaxã nüxũ pexu i
 duũxũgũ i Yabécũãxgũ rü moxũ
 tocuchigu tá ngëma tangugũ nax
 ítanapoxũxũçax! —nhanagürü. Rũ yema
 duũxũgũ rü natanũxũ ga
 Yabécũãxgũmaxã nüxũ narüxugüe ga
 yema ore. Rũ nümagũ rü poraãcü
 nataãxëgũxũchi. ¹⁰Rũ nüma ga yema
 Yabéarũ äëxgacügũ rü
 Amóütanũxũgũarũ äëxgacũ ga Naámaxã
 nüxũ nayarüxugũ, rü nhanagürügũ:
 —Moxũ rü tá cuxna togũ tana nax cuma
 cunaxwaxexũ tomaxã cuxũxũçax
 —nhanagürügũ. ¹¹Rũ moxũãcü rü nüma
 ga Chaú rü norũ churaragũxũ mea
 ininu, rü tamaepũxtücümügu
 nayayauxye. Rũ naxũpa ga nax
 yangóonexũ rü norũ uanügũ ípegũxũgu
 nachocu. Rũ tüxũ nadai ga guxãma ga
 Amóütanũxũgũ nhũxmata tocuchiwa
 nangu. Rũ guxema maxëxe, rü
 tũgũmaxã tanawoone, rü yemacax
 taxúema ämücũxe tinha. ¹²Rũ
 yemawena ga nümaxũ ga duũxũgũ rü
 Chamuéxũ nhanagürügũ: —¿Texégũ tixĩ
 ya yíxema tama yaxögũxe nax Chaú
 yixĩxũ ya mecũ nax tóru äëxgacũ
 yixĩxũ? ¡Rũ toxna penamugũ i ngëma
 yatügũ nax tanadaixũçax!
 —nhanagürügũ. ¹³Notürũ nüma ga
 Chaú rü naétüwa nachogũ rü
 nhanagürü: —Nhama i ngunexũgu rü
 taxúetáma tayu, erũ Cori ya Tupana rü
 Iraéuanecũãxgũxũ narüngũxêê nax norũ
 uanũxũ nax naporamaegũxũçax
 —nhanagürü. ¹⁴Rũ nüma ga Chamué rü

guxũma ga Iraéuanecüãxgũxũ
 nhanagürü: —¡Ngĩxã rü Yigáwa taxĩ nax
 ngéma yanguncuchixẽxũcax ya tórü
 ãëxgacü! —nhanagürü. ¹⁵Rü yemacax
 guxũma ga duũxũgü ga Iraéuanecüãxgũ
 rü Yigáwa naxĩ. Rü yéma Cori ya
 Tupanapexewa Chaúxũ
 ningucuchixẽëgü nax norü ãëxgacü
 yixĩxũcax. Rü yemawena rü Tupanacax
 nayagugü ga ãmaregü ga Tupanaarü
 ngüxmüxẽëruũgü ixĩgixũ. Rü nüma ga
 Chaú rü guxũma ga nümagü ga
 Iraéuanecüãxgũ rü poraäcü nataãxëgü.

Chamué rü Chaúmexëwa
nanaxüexëxë nax
Iraéuanecüãxgüarü ãëxgacü
yixĩxũcax

12 ¹Rü yemawena ga Chamué rü
 guxũma ga
 Iraéuanecüãxgüpepexewa nhanagürü:
 —Pema nüxũ pecuax rü guxũma ga
 yema naxcax ípecaxaxũ rü pexcax
 chanaxü nax yanguncuchixũcax ya yimá
 perü ãëxgacü ya réi. ²Daa nixĩ ya
 ãëxgacü ya pemaxã tá icuácü. Chama rü
 marü chaya rü chataueru, rü chaunegü
 rü petanüwa nangexmagü. Chama nixĩ
 ga pemaxã ichacuáxũ ga yexguma
 changextüxügüürüwa rü nhamamare.
³Rü nhuxmax rü daxe chixĩ. Ega
 ngëxguma chi texéarü wocacax rüexna
 búrucax changĩxgux, rüexna texéchi
 chaxaixgu, rü chixri tümamaxã
 ichacuaxgu rüexna chanayauxtanüga
 taxacürü guxchaxũ chamexëëxgu, rü
 marü name i Cori ya Tupanapexewa rü
 napexewa ya yimá ãëxgacü ya Tupana
 nüxũ unetacü, rü choxũ ípexuaxũ. Rü
 chama rü tá chanaxütanü i ngéma pexũ

changetanüxũ —nhanagürü. ⁴Rü nüma
 ga Iraéuanecüãxgũ rü nanangãxũgagü,
 rü nhanagürügü: —Taguma toxchi cuxai
 rüexna chixri tomaxã icucuax, rü
 taguma cunayauxtanü ga torü guxchaxũ
 cumexëëgu —nhanagürügü. ⁵Rü nüma
 ga Chamué rü nhanagürü: —Nhuxma rü
 nüma ya Cori ya Tupana, rü nüma ya
 yimá ãëxgacü ya nüma nüxũ
 naxunetacü nixĩ ya nüxũ ñnecü nax
 pema rü taxuxũma i chixexũ chawa
 ípeyangauxũ —nhanagürü. Rü nüma ga
 duũxũgü rü nhanagürügü: —Aixcuma
 ngémaäcü nixĩ —nhanagürügü. ⁶Rü
 nüma ga Chamué rü nhanagürü ta nüxũ
 ga yema Iraéuanecüãxgũ: —Rü nüma ga
 Cori ya Tupana nixĩ ga Moichéxũ rü
 Aróuxũ naporaexëëxũ nax Eyítuanewa
 perü oxigixũ ínanguxũxëëxũcax.

.....

¹²Notürü ga pema ga yexguma
 Amóütanüxũgüarü ãëxgacüxũ
 pexĩnüegu nax pexcax
 íyachoöchichaũxũ nax pexũ nadaixũcax,
 rü choxna naxcax peca ga wüxi ga
 ãëxgacü nax pemaxã inacuáxũcax woo
 nax Cori ya Tupanachirëx nax yixixũ ya
 perü ãëxgacü. ¹³Rü daa nixĩ ya yimá
 ãëxgacü ya pematama naxcax
 ípecaxacü. Rü nüma ya Cori ya Tupana
 rü marü pexna nanamu ya yimá
 ãëxgacü ya naxcax ípecaxacü. ¹⁴Rü
 nhuxmax i pema rü name nixĩ i aixcuma
 Tupanaxũ pengechaũgü, rü nüxũ
 pecuaxüxũgü rü, naga pexĩnüe i
 guxũma i ngéma norü mugü. Rü wüxigu
 namaxã ya yimá perü ãëxgacü rü
 penaxwaxe i Tupana naxwaxexũäcüma
 pemaxë. Rü ngëxguma ngémaäcü
 penaxüxgu rü guxütáma mea nixũ.

¹⁵Notürü ngëxguma taxütáma naga pexĩnuegu rü ngëxguma nüxũ pexoxoxgu i ngëma norü mugü, rü nüma ya Tupana rü tá pexũ rü perü ãëxgacüxũ napoxcu. ¹⁶¡Rü dücac, iperüdaunü naxçax i ngëma taxũ i mexũ i Cori ya Tupana pepexewa tá üxũ i nhüxmax! ¹⁷Pema rü meama nüxũ pecuax rü nhüxmax nax tríguarü buxgüwa nanguxũ rü taguma napu. Rü ngëmacax i nhüxmax rü tá Tupanana chaca nax ãëmacü rü pucü nua namuxũçax nax ngëmawa nüxũ pecuaxächitanüxüçax i ngëma chixexũ i taxũ i pexüxũ ga yexguma wüxi ya perü ãëxgacüçax ípeçaxgu —nhanagürü. ¹⁸Rü yexguma ga nüma ga Chamué rü Tupanana naca. Rü yexgumatama nüma ga Cori ya Tupana rü ãëmacü inanaxüxëxë rü nanapuxëxë. Rü yexguma ga guxüma ga yema duüxüügü rü poraäcü Cori ya Tupanaxũ rü Chamuéxũ namuñe. ¹⁹Rü yemaçax guxüma ga yema duüxüügü rü Chamuéxũ nhanagürügü: —¡Cori ya curü Tupanana toxçax naca nax tama tayuexüçax! Erü nhüxmax rü tanayexeraxëxë i guxüma i torü chixexüügü nagagu nax wüxi i torü ãëxgacü i réicax nax ítacaxaxũ —nhanagürügü. ²⁰Rü nüma ga Chamué rü nanangãxüga rü nhanagürü: —¡Taxuçaxma pemuñe! Rü aixcuma nixĩ ga chixexũ pexüxũ. Notürü i nhüxmax rü ¡pexuãxë nax tama Cori ya Tupanana pexĩgachixüçax, rü aixcuma nüxũ pengechaüügüxüçax rü nüxũ pecuaxüügüxüçax! ²¹Rü tama name i nawe perüxĩ i ngëma tupanagüneta i tama pexũ rüngüxëxëxũ rü tama pexũ maxëxëxëxũ, erü doragümare nixĩ i

ngëma. ²²Rü nümatama ya Cori ya Tupana rü marü pexũ nade yerü yemaacü nanaxwaxe, rü nüxũ nixu nax norü duüxüügü pexĩgüxũ. Rü ngëmacax tagutáma pexũ ínawogü erü tama nanaxwaxe i texé nüxũ tixu nax tama yanguxëëxũ i norü ore. ²³Rü nhüxmaxwena i chama rü tama chanaxwaxe i nüxũ charüchau nax pexçax chayumüxëxũ, erü ngëma rü chixexũ nixĩ. Rü ngëmacax tá pexũ changüxëëama nax mea Cori ya Tupanaçax pemaxëxũ rü mea nawe nax perüxixüçax. ²⁴Rü nhüxmax i pema rü penaxwaxe i Tupanaaxü peyaxögü rü aixcuma nüxũ pecuaxüxüügü. ¡Rü nagu perüxĩnue nax nhuxäcü poraäcü pexũ nax nangüxëxëxũ! ²⁵Notürü ngëxguma chi chixexũ pexügüamagu, rü nüma ya Cori ya Tupana rü tá poraäcü pexũ rü perü ãëxgacüxũ napoxcu —nhanagürü ga Chamué.

.....

Cori ya Tupana rü Chaúxũ naxo

15 ¹Rü wüxi ga ngunexügu rü Chamué rü Chaúxũ nhanagürü: —Nüma ga Cori ya Tupana nixĩ ga choxũ namuxũ nax chíxümaxã cuxũ chabaeruxüçax nax yemaacü Iraéuanecüãxgüarü ãëxgacü quixixüçax. ¡Rü ngëmacax irüxĩnü i ngëma Cori ya Tupana cumaxã nüxũ ixuxũ! ²Rü nhanagürü ya Cori ya Tupana ya guxãétüwa ngëxmacü: “Chanapoxcu tá i ngëma Amaréchitanüxüügü naxçax ga yema Iraéutanüxüügümaxã naxügüxũ, yerü yexguma Eyítuanewa ínachoxügu rü tama norü naanewa nanachopetüxëxëchaũ. ³Rü ngëmacax

ꞑngéma naxũ rü nadai i guxũma i ngẽma Amaréchtanũxũgü iyatũxũ, rü ingexũ, rü buxũgü, rü õxchanagü, rü wocagü, rü carnérugü, rü camérugü, rü búrugü! ꞑRü bai tá i wüxi ícuyaxüxëxũ!”

—nhanagürü ga Cori ya Tupana. ⁴Rü nüma ga Chaú rü guxũma ga duũxũgüçax nangema rü Teraíũgu nanangutaqexexëxë. Rü 200,000 ga churragü nixĩ ga íxĩmarexũ. Rü yemaétüwa nayexma ga 10,000 ga yatügü ga Yudátanũxũ íxĩgũxũ ga yexma ngutaqexegũxũ.

.....

⁷Rü yemawena rü nüma ga Chaú rü nanadai ga yema Amaréchtanũxũgü. Rü Abíraanewa inanaxügü rü nanadai nhuxmata Chúrwa nangu ga Eyítuanearü üyeanewa. ⁸Rü nayayauxgü ga guma norü ãëxgacü ga Agáche rü nanadai ga guxũma ga norü churragü. ⁹Notürü nüma ga Chaú rü yema norü churragü rü tama nayamaxgü ga guma Amaréchtanũxũgüarü ãëxgacü ga Agáche, rü tama nanadai ga yema rümemaegũxũ ga carnérugü, rü wocagü, rü wocaxacügü. Rü tama ínanagu ga yema Amaréchtanũxũgüarü yemaxũgü ga itatanũxũ. Rü yema yemaxũgü ga taxuwama ímexũxícatama nixĩ ga yema ínaguxũ. ¹⁰Rü yemawena ga Cori ya Tupana rü Chamuémaxã nidexa rü nhanagürü: ¹¹—Choxũ nangux ya Chaú nax ãëxgacüxũ nüxũ nax chaxunetaxũ, erü choxna nixũgachi rü tama nayanguxëxë i ngẽma chanamuxũ —nhanagürü. Rü nüma ga Chamué rü poraãcü naãxëwa nangux ga yema. Rü Cori ya Tupanamaxã nidexa ga guxũma ga yema chütaxũgu. ¹²Rü moxũãcü

paxmama ga tauta yangóonegu, rü nüma ga Chamué rü inaxũãchi nax Chaúçax yadauxũ. Notürü ga duũxũgü rü Chamuémaxã nüxũ nixugüe ga Chaú rü Maxpúne ga Carméruwa nax naxũxũ nax yéma íyanadaxëãxũçax ga wüxi ga nutapúta ga cuaxruxũ nax norü uanügũxũ naporamaexũ, rü yemawena rü nhuxũchi Yigáwa nax naxũxũ. ¹³Rü yexguma yemaxũ nacuaçxu ga Chamué rü Chaúçax nayadau rü düxwa yema ínayemaxũwa nangu. Rü nüma ga Chaú rü nüxũ narümoxë rü nhanagürü nüxũ: —ꞑCori ya Tupana cuxũ rüngũxëxë! Rü marü chayanguxëxë i ngéma Cori choxũ muxũ —nhanagürü. ¹⁴Rü nüma ga Chamué nanangãxũga rü nhanagürü: —¿Texéarü nixĩ i ngẽma carnérugü i ngẽma iwáichaũ, rü ngẽma wocagü i ngẽma icagũxũ i nüxũ chaxínũxũ? —nhanagürü. ¹⁵Rü nüma ga Chaú rü nanangãxũga rü nhanagürü: —Ngẽma chorü churragü rü ínayaxügüxëxë i ngẽma rümemaexũ i carnérugü, rü wocagü. Notürü Cori ya curü Tupanacax tá tanadai. Rü guxũma i ngẽma togü i naxũnagü i Amaréchtanũxũgüarü rü marü tanadai —nhanagürü. ¹⁶Rü nüma ga Chamué rü Chaúxũ nhanagürü: —ꞑDüçax, irixĩnũ i ngẽma ngewax chütacü Tupana chamaxã nüxũ ixuxũ! —nhanagürü. Rü nüma ga Chaú rü ínaca rü nhanagürü: —¿Nhuxü nhaxũ cuxũ? —nhanagürü. ¹⁷Rü nüma ga Chamué rü nanangãxũga rü nhanagürü: —Yexguma cugügu curüxĩnũgu ga taxuwama nax cumexũ, rü nüma ga Tupana rü cuxũ nayaxu ga Iraéuanecüãxgüarü ãëxgacü nax quixĩxũçax. ¹⁸Rü yexguma rü cuxçax

choxna naxãga nax cuyadaixũcax i guxũma i ngẽma Amaréchitanũxũgũ i chixexũgu ímaxẽxũ rũ taxuxũtãma nax ícuyaxũxẽẽxũcax, nhanagũrũ cuxũ.

¹⁹¿Rũ nhuxmax taxacũcax tama Tupanaga cuxĩnũ? ¿Rũ tũxcũũ cunhuxãẽ nax cunadexũ i ngẽma ngẽmaxũgũ i Tupana cuxna chuxuxũ, rũ tama cunaxũ i ngẽma cuxũ namuxũ? —nhanagũrũ.

²⁰Rũ nũma ga Chaú rũ nanangãxũga rũ nhanagũrũ: —Chama rũ Cori ya Tupanaga chaxĩnũ, rũ chayanguxẽxẽ ga guxũma ga yema choxũ namuxũ. Rũ guma Agáche ga Amaréchitanũxũgũarũ ãẽxgacũ ga chiyaxucũ rũ nua chanaga, rũ marũ chanadai ga guxũma ga yema togũ ga Amaréchitanũxũgũ. ²¹Rũ yema churaragũ nixĩ ga nadexũ ga yema rũmemaegũxũ ga carnérugũ rũ wocagũ rũ yemaxũgũ nax Yigáwa Tupanacax ínaguaxũcax —nhanagũrũ. ²²Rũ nũma ga Chamué rũ ínaca rũ nhanagũrũ: —¿Taxacũ nixĩ i ngẽma rũmemaexũ cuxcax? ¿Rũ cuxcax rũ ngẽma naxũnagũ Tupanacax iguxũ rũ ẽxna Tupanaga nax ixĩnũxũ? Rũ dũcax rũ ngẽma Tupana yexera namaxã taãxẽxũ nixĩ nax naga ixĩnũxũ, rũ tama carnérugũarũ chíxũ naxcax nax íguxũ. ²³Rũ yíxema tama Tupanaga ínũxe rũ nhamatama tayuũxũrũxũ porãcũ chixexũ taxũ i Tupanapexewa. Rũ yíxema chixri Tupanaga ínũxe rũ nhamatama tupanametaxũ ticuaxũũrũxũ chixexũ taxũ. Rũ dũcax, rũ nhuxmax nax nũxũ cuxoxũ i norũ mugũ, rũ nũma ya Tupana rũ cuxũ naxo nax Iraéuanecũãxgũarũ ãẽxgacũ quixĩxũ —nhanagũrũ ga Chamué.

.....

³⁴Rũ yemawena ga Chamué rũ norũ ãane ga Ramáwa naxũ. Rũ nũma ga Chaú rũ nachiũcax natãegu ga Yibéawa. ³⁵Rũ nũma ga Chamué rũ taguma wena Chaúxũ nadau, notũrũ naxcax naxauxecha, yerũ Tupanaaxũ nangux ga Chaúxũ Iraéuanecũãxgũarũ ãẽxgaciwa nax nanguxẽẽxũ.

**Chamué rũ chíxũmaxã Dawíxũ
nabaeru nax Iraéuanecũãxgũarũ
ãẽxgacũ yixĩxũcax**

16 ¹Rũ yemawena ga Tupana rũ Chamuéxũ nhanagũrũ: —Marũtama nax Chaúcax nax cungechaũechaxũ, erũ marũ tama chanaxwaxe nax Iraéuanecũãxgũarũ ãẽxgacũ nax yixĩxũ. ¿Rũ wũxi i carnéruchatacuxre nayaxu rũ orĩwaarũ chíxũmaxã naxũãcu! ¿Rũ Beréũwa naxũ rũ ngẽxma naxcax yadau ya wũxi ya yatũ ya Yechégu ãegacũ! Erũ wũxi ya nane chanayaxu nax ngexwacaxũcũ ya Iraéuanecũãxgũarũ ãẽxgacũ nax yixĩxũcax —nhanagũrũ.

.....

⁴Rũ nũma ga Chamué rũ nanaxũ ga yema Tupana namaxã nũxũ ixuxũ. Rũ yexguma Beréũwa nanguxgu, rũ guma ãanearũ ãẽxgacũgũ rũ namũẽãcũma nanayauxgũ, rũ nũxna nacagũie rũ nhanagũrũgũ: —¿Taxacũ nangupetũ? ¿Rũ taxaciwa nua cuxũ? —nhanagũrũgũ. ⁵Rũ nũma ga Chamué rũ nanangãxũga rũ nhanagũrũ: —Taxuxũma nixĩ i ngupetũxũ. Rũ nua chaxũ nax Tupanacax wũxi i naxũna chimáxũcax. ¿Rũ ngẽmacax Tupanacax pegũ pemexẽẽgũ rũ choxũ ípixĩmũcũ nax ngẽma naxũnaarũ mãxwa rũ Tupanaarũ cuaxũũwa

ipexãgüxüçax! —nhanagürü. Rü yemawena ga Chamué rü nacümagüäcü Yechéxü rü nanegüxü Tupanaçax nimexêxê, rü nüxna naxu nax íyaxüümüçügüäxüçax ga Tupanaarü cuaxüüwa. ⁶Rü yexguma Tupanaxü íyacuaxüügüçaxüüwa nangugügu ga Yeché rü nanegü, rü nüma ga Chamué rü Yeché nane ga Eriábexü nadawenü rü nhaxügu narüxînú: “Cuxá daa nixí ya yimá yatü ya Tupana nayaxucü nax Iraéuanecüãxgüarü ãëxgacü yixíxüçax”, nhaxügu narüxînú. ⁷Notürü ga Tupana rü Chamuéxü nhanagürü: —Tama name i norü düxétümare rü norü máchanemare nax cungugüxü ya wüxi ya yatü. Tama daa nixí. Chama rü tama duüxügü nangugüxüãcüma chanayaxu ya wüxi ya yatü. Duüxügü rü ngëma düxétüxünemare nixí inangugügüxü, notürü i chama rü ngëma norü maxü rü norü inü nixí i ngëma changugüxü —nhanagürü. ⁸Rü yexguma ga Yeché rü nane ga Abinadábicax naca, rü Chamuéxütawa nanaga. Notürü nüma ga Chamué rü nüxü nixu ga tama gumá nax yixíxü ga Tupana nayaxucü. ⁹Rü yemawena ga Yeché rü nane ga Chamáxü Chamuéxütawa naga, notürü nüma ga Chamué rü nhanagürü: —Tama daa nixí ya Tupana nayaxucü —nhanagürü. ¹⁰Rü nüma ga Yeché rü 7 ga nane Chamuépexewa nagagü, notürü nüma ga Chamué rü nüxü nixu nax taxucüma ga gumatanüwa Tupana nayaxuxü. ¹¹Rü nüma ga Chamué rü Yechéna naca rü nhanagürü: —¿Nangexmaxü ya nai ya cune? —nhanagürü. Rü nüma ga Yeché nanangäxüga rü nhanagürü: —Yimá rübumaecüicatama nixí i yataxucü, erü

yéa naanewa carnérügüna nadau —nhanagürü ga Yeché. Rü yexguma ga nüma ga Chamué rü nhanagürü: —¿Ëcü nhüxmatama wüxi i duüxüxü ngëma namu nax naxçax yacaxaxüçax! Erü taxütáma ítarütogü nax ichibüexüçax nhüxmatáta ínangu i nümax —nhanagürü. ¹²Rü yexguma ga nüma ga Yeché rü wüxi ga duüxü yéma namu nax naxçax yacaxaxüçax. Rü nüma ga guma ngextüxüci rü nachox, rü nachoxyae rü nidauüchametüci rü namecümachametü. Rü nüma ga Tupana rü Chamuéxü nhanagürü: —Daa nixí. ¿Rü êcü nabaeru! —nhanagürü. ¹³Rü nüma ga Chamué rü nanayaxu ga yema carnéruchatacuxre ga chíxümaxá äácuxü, rü Dawíerugu nanaba ga naeneegüpexewa. Rü yexgumatama ga Tupanaãxê rü Dawína nangu rü namaxá inacuax. Rü nhüxüchi ga nüma ga Chamué rü norü ñane ga Ramáçax natáegu. ¹⁴Rü yexgumayane ga Tupanaãxê rü Chaúna nixügachi. Rü nüxna nangu ga wüxi ga naãxê ga chixexü ga naxixächíãëxêxü ga Cori ya Tupana yéma muxü. ¹⁵Rü yemacax ga yema norü duüxügü ga ngüxêëruügü ixígüxü rü nhanagürügü nüxü: —Pa ãëxgacüx, wüxi i chixexü i naãxê i Tupana nua muxü cuxna nangu, rü ngëma nixí i cuxü naxixächíãëxêxü. ¹⁶¿Rü tûxcüü tama toxü cumu nax wüxi i meama paxetaxü cuáxüçax nax tadauxü rü cupexewa árpax nax napaxüçax ega ngëxguma cuxna nanguuxügu i ngëma naãxê i chixexü? Rü ngëma paxeta tá cuxü nataãxêxêxê rü mexü tá cumaxá naxü —nhanagürügü. ¹⁷Rü nüma ga Chaú rü nhanagürü: —Marü name ¿Rü

naxçax choxú pedax i wüxi i paxetatanüxü i árpaarü paxüxü mea cuáxü, rü nua penaga! —nhanagürü. ¹⁸Rü yexguma ga wüxi ga norü duüxü rü nhanagürü: —Chama nüxü chadau i wüxi i Yeché nane i Beréüwa ngëxmaxü, rü meama paxetaxü nacux. Rü nhüxmachi wüxi i poracü nixí i daiwa rü nüxü cuácü nixí ega yadexagu. Rü nüma rü mecü nixí rü Cori ya Tupana nüxü rüngüxëcü nixí —nhanagürü. ¹⁹Rü yexguma ga Chaú rü Yechéütawa nanamugü ga norü duüxügü nax nüxü nhagüxüçax: “¡Nua namu ya cune ya Dawí ya yimá carnérugüarü daruxü ixicü!” ²⁰Rü nüma ga Yeché rü nane ga Dawíxü Chaúütawa namu. Rü guma nanemaxá Chaúçax yéma nanamu ga wüxi ga búru ga poümaxá áxwetaxü rü wüxiwexü ga wü rü wüxi ga bóyiacü. ²¹Rü yemaacü ga Dawí rü Chaúütawa naxü, rü yéma naxütawa nayexma. Rü nüma ga Chaú rü Dawíxü nangechaüxüchi, rü norü ngüxëeruxü nayaxixëxë. ²²Rü nüma ga Chaú rü Yechéütawa namuga rü Dawíçax ínaca nax nügüxütawa nayexmaxëäxüçax, yerü poraacü norü me nixí. ²³Rü yexguma Chaúna nanguxügu ga yema naäxë ga chixexü ga Tupana naxçax yéma muxü, rü nüma ga Dawí rü nanayaxuxü ga árpa rü nanapaxüxü. Rü yemamaxá ga nüma ga Chaú rü nataäxëäxü rü naxçax nitaaneäxü, rü nüma ga naäxë ga chixexü rü nüxna nixügachiäxü.

Dawí rü Goriáxü nimax

17 ¹Rü nüma ga Firitéutanüxügü rü nananutaqexexëgü ga norü churaragü nax Iraéuanecüäxgüarü

churaragümaxá nügü nadaixüçax. Rü Efedamíügu nayangutaqexegü ga íanegü ga Chocú rü Achécaarü ngäxümachatexewa ga Yudáanewa. ²Rü nüma ga Chaú rü Iraéuanecüäxgümaxá nügü nanutaqexegü ga Eláaru ngatexügu. Rü yéma nügü namexëégü ga Firitéutanüxügümaxá nügü nax nadaixüçax. ³Rü nümagü ga Firitéutanüxügü rü wüxi ga maxpünegu nügü ninu, rü yexgumarüxü ta ga Iraéuanecüäxgü, rü náí ga maxpünegu nügü ninu. Rü guma taxre ga maxpünegüarü ngate rü ngäxüwa naxü. ⁴Rü yema Firitéutanüxügütanüwa nixüxü ga wüxi ga churara ga 3 métrugu ixüchanexü, rü yema ngatexüwa naxü. Rü Goriáx nixí ga naéga, rü íane ga Gáyicüäx nixí. ⁵Rü napatexe rü bróchenaxçax nixí. Rü naxünewa rü yexgumarüxü ta bróchemaxá natüxüne. Rü yema norü tüxünexü rü 55 quíru nixí ga nayaxü. ⁶Rü yema norü tüperemaxü rü guma norü wocae ga nügüätü yangeäcü rü bróchenaxçax nixígü. ⁷Rü guma norü wocae rü natamenaxá rü ga napexë rü férunaxçax nixí rü 6 quíru naya. Rü Goriáxpegegu nixüchigü ga yema norü poxüruüarü ngeruxü. ⁸Rü nüma ga Goriáx rü yema ngatexüarü ngäxüwa ínayachaxáchi rü yéma tagaäcü Iraéuanecüäxgüarü churaragüxü nhanagürü: —¿Taxacüçax mea pegü ipinu nax tomaxá pegü pedaxüçax? Erü chama rü wüxi i Firitéutanüxü chixí rü name nixí i pema i Iraéuanecüäxgü rü Chaúarü churaragütanüxüwa nüxü pexuneta i wüxi nax naxüxüçax nax togü namaxá tadaixüçax. ⁹Rü ngoxi tá

choxũ naporamae rü choxũ yamá nax ngẽmaãcü pexmexwa nax tangemagũxũcax. Notürü ngẽxguma chama nüxũ charüporamaegu, rü pema tá nixĩ i toxmexwa pengexmagũxũ. ¹⁰Rü nhama i ngunexũgu, Pa Iraéuanecüãxgüarü Churaragũx, rü pexcax chaca rü jẽcü nua penamux i wüxi i perü churara nax togü namaxã tadaixũcax! —nhanagürü. ¹¹Rü yexguma yema Firitétanüxũarü dexaxũ naxĩnuegu ga Chau rü guxũma ga yema namücügü ga Iraéuanecüãxgü, rü narümaxächitanü rü namuũe. ¹²Rü nayexma ga wüxi ga yatü ga Berẽcüãx ixĩcü rü Yeché nixĩ ga naéga. Rü nüma rü marü naya ga yexguma Chau ãxgacü ixĩxgu. Rü nüma ga Yeché rü nüxũ nayexma ga 8 ga nanegü, rü wüxi ga nane rü Dawí nixĩ. ¹³⁻¹⁴Rü guma tamaepux ga nane ga rüyamaegũxũ ga Eriabé rü Abinadábí rü Chamá rü marü Chauwe narüxi ga daiwa. ¹⁵Rü nüma ga Dawí ga rübumaecü rü Iraéuanecüãxgüarü churaragü íyexmagũxũwa naxũxũ rü nhuxüchi Berẽcücax natáeguaxũ nax nanatüarü carnérugüna yadauuuxũcax. ¹⁶Rü yoxni yexguma yéma naxũxũyane ga Dawí, rü nüma ga yema Firitétanüxũ rü Iraéuanecüãxgũxũ nachixewe ga paxmama rü yáuanecü. Rü yemaacü tímamaxã nixĩ nhuxmata 40 ga ngunexũwa nangu. ¹⁷Rü wüxi ga ngunexũgu ga Yeché rü nane ga Dawíxũ nhanagürü: —jËcü nayaxu i wüxiwetaxũ i trígu i igoxtanüxũ, rü nhaa 10 i poũ rü yéa nügü ínadaixchaũxũwa cueneegücax nana! ¹⁸jRü nhuxmachi ngéma nana ta i nhaa

10 púta i quéyu naxcax ya yimá churaragüarü ãxgacü! jRü cueneegũxũ íyadau rü nhuxácü nüxũ nangupetügü, rü wüxi i norü popera nua nange nax ngẽmawa nüxũ chacuáxũcax nax meama nüxũ nax ínangupetügũxũ! —nhanagürü ga Yeché. ¹⁹Rü nüma ga Chau rü yema Iraéuanecüãxgüarü churaragü rü yema maxpúnearü tuãchixũ ga Elágu áégaxũwa nayexmagü. ²⁰Rü moxũãcü ga nüma ga Dawí rü yexwacax yangóonechaxũgu rü to ga daruümexëgu tüxũ namugü ga guxema nanatüarü carnérugü rü inaxũächi. Rü nayana ga yema ðna ga nanatü ga Yeché nüxna naxũ. Rü yéma naeneegü íyexmagũxũwa nangu ga yexguma inaxĩächichaũxgux ga Firitétanüxũgümaxã nügü nax nadaixũcax. ²¹Rü nüma ga Iraéuanecüãxgü rü ga Firitétanüxũgü rü nügüarü toxmaxtagu nügü ninu. ²²Rü nüma ga Dawí rü yema Iraéuanecüãxgüarü churaragüarü yemaxũgüarü daruũxütagu nananu ga yema trígu, rü poũ, rü quéyu ga yéma nanaxũ, rü nhuxüchi nanhaãchiãcüma Iraéuanecüãxgüarü churaragütanügu nayangaxi nax naeneegüna nacaxaxũcax rü nhuxácü nüxũ nangupetügü. ²³Rü yexguma naeneegümaxã ídexayane, rü nüma ga yema Firitétanüxũ ga Goriáx ga Gáyicüãx ixĩxũ, rü Firitétanüxũgüarü churaragütanüwa nichixichi. Rü wenaxarü Iraéuanecüãxgücax naca rü tüxũ naxãxüne rü yema aixrüguma naxüürüũãcüma nidexa. Rü nüma ga Dawí rü nüxũ naxĩnü. ²⁴Rü nümagü ga Iraéuanecüãxgü ga yexguma yema

yatüxũ nadaugügu rü poraãcü namuñe, rü naxchaxwa nibuxmü. ²⁵Rü nügümaxã nhanagürügü: —¿Marü nüxũ pedauxũ i ngëma yatü i ngëxma ichixichixũ nax nhuxãcü tüxũ naxãxünexũ i yixema i Iraéuanecüãxgü? Rü texé ya yixema nüxũ rüporamaexe, rü nüma ya tóru ãëxgacü rü muxütáma i ngëmaxügü tá tüxna nana, rü naxacümaxã tá tüxũ naxüxmaç rü taxütáma tüxũ nanaxütanüxëxë i ngëma diëru i ãëxgacüna üxũ —nhanagürügü. ²⁶Rü yexguma ga Dawí rü yema naxütawa yexmagüxüna naca rü nhanagürü: —¿Taxacümaxã tá nüxũ naxãtanü ya yimá yatü ya nhaa Firitéutanüxüxũ imácü rü naxoxëcü nax ngëma Iraéuanecüãxgümaxã taxacü nax yaxugüxũ? ¿Erü taxacü nixí i nhaa Firitéutanüxü i tama Tupanaxü cuáxũ ecax Tupana ya maxücüarü churaragümaxã taxacü yaxugüxũ? —nhanagürü. ²⁷Rü nümagü ga Iraéuanecüãxgüarü churaragü rü Dawíxũ nangãxügü, rü yema noxri namaxã nüxũ yaxugüexümaxátama nanangãxügagü, rü namaxã nüxũ nixu ga taxacümaxã tá nüxũ nax naxütanüãxũ i ngëma Goriãxũ imãxũ. ²⁸Notürü nüma ga Eriabé ga Dawíenexë ga yacü, rü nüxũ naxínü ga yema yatügümaxã nax íyadexaxũ ga Dawí. Rü yemaçax naeneemaxã nanu rü nhanagürü nüxü: —¿Taxacüwa nua cuxü? ¿Rü texëmaxã ngëma ínachianexüwa cunawogü i ngëma tanatüarü carnérugü? Chama rü marü nüxũ chacuax i ngëma cucüma nax nua cuxüxũ nax icuyadawenümarexüçax nax togü tadaixũ —nhanagürü. ²⁹Rü nüma

ga Dawí rü nanangãxüga rü nhanagürü: —¿Taxacü ëxna chaxü ecax ngëma nhacuxũ choxü? Rü nua chidexamare —nhanagürü. ³⁰Rü yemawena ga Dawí rü naeneena nixügachi, rü to ga churarana naca. Rü yemaacütama nanangãxüga. ³¹Rü nümaxũ ga Iraéuanecüãxgü ga Dawíxũ ñnüexũ ga nax ínacaxũ, rü Chaúmaxã nüxũ narüxugüe. Rü nüma ga Chau rü Dawíçax nangema. ³²Rü yexguma ga Dawí rü Chauxũ nhanagürü: —Tama name nax texé oëgaãxü nagagu i nhaa Firitéutanüxü, erü chamaçax i cuxü puracüxe nax chixixü, Pa ãëxgacüx, rü ngëma tá chaxü rü namaxã tá togü tadaí —nhanagürü. ³³Rü nüma ga Chau rü nanangãxüga rü nhanagürü: —Rü taxuacüma cuxica ngëma Firitéutanüxümaxã pegü pedai. Erü cuma rü cungextüxüxüchü, notürü i nüma rü norü ngextüxügücürüwa dajçax nangux —nhanagürü. ³⁴⁻³⁵Rü nüma ga Dawí rü nanangãxüga rü nhanagürü: —Yexguma chaunatüarü carnérugüna chadaçxu, rü wüxi ga leáü rüëxna wüxi ga ósu i düraxü yéma ne üxgu rü wüxi ga carnéru tüxü yayaxugu, rü chama rü nawe changë, rü naaxwa tüxü chanapu. Rü yexguma chaüxçax yanhaxgu nax choxü yayaxuxüçax, rü nachicürawa chatüxüe rü chayachixgü rü nhuxmata chayamaç. ³⁶Rü chama i curü duüxü, Pa ãëxgacüx, rü woo leáü yixügu rü ósu i düraxü yixügu rü chayamaç. Rü nhaa Firitéutanüxü i tama Tupanaxü cuáxü rü ngëmaãcü tá namaxã chanaxü, erü Tupana ya maxücüarü churaragüxũ naxãxüne. ³⁷Rü gumá Cori ya Tupana ga leáüna rü ósu i

düraxũna choxũ ípoxũcü, rü yimatátama nixĩ i nhaa Firitétanũxũmexẽwa choxũ ípoxũcü —nhanagürü. Rü yexguma ga Chaú nanangãxũga rü nhanagürü: —¡Ëcü ngéma naxü rü Cori ya Tupana cuxũ íxümücü! —nhanagürü. ³⁸Rü yemawena nanamu nax Dawíxũ yacuxcuchigixũ nagu ga yema naxchiru ga bróchenaxcax ga nümatama ga Chaú nagu yacuxuuxũ. Rü bróchenaxcax ga napatexemaxã nanaxüpatexe. Rü naremüarü poxüruxũ rü naxcaxwexarü poxürüügu nayacuxẽëgü. ³⁹Rü yemawena ga Dawí rü norü goyexüwa norü tara ningaxcuchi. Rü nüxũ naxü ga nax yaxüxũ namaxã ga yema nügüxũnewa nanucuxũ. Notürü tama namaxã nixü ga guxũma ga yema nügüxũnewa nanucuxũ yerü taguma yema nügü naxú. Rü yexgumatama Chaúxũ nhanagürü: —Taxuacüma chixü namaxã i nhaa chaxunewa ngëxmagüxũ erü tama chamaxã nixü —nhanagürü. Rü yexguma rü nügü ínacuxũxũne ga Dawí. ⁴⁰Rü yemawena rü nanayaxu ga guma norü naixmenaxã rü nixügachi. Rü yema ngatexüwa nanade ga 5 püxü ga nutaxacü ga íbáípüxücü rü norü chacu ga yangechigixũügu nananucu. Rü nhüxüchi norü maxgütaexũ ga naxmexgu yangexũmaxã yema Firitétanũxũcax nixü. ⁴¹Rü nüma ga Firitétanũxũ rü meamare Dawícax nixüchigü. Rü napexegu nixüchigü ga yema norü poxürüüarü ngeruxũ. ⁴²⁻⁴³Rü yexguma Dawíxũ nadaxgux ga yema Firitétanũxũ nax wüxi ya ngextüxücü ga idauũchametücüücü nax yixixũ rü mecü nax yixixũ, rü tama

nayaxaixcumaãxũ nax nügü namaxã nadaixũ. Rü nhanagürü nüxũ: —¡Ëxna cuxcax rü wüxi i airu chixĩ ecax naimaxã nua chaxcax cuxxũ? —nhanagürü. Rü yexgumatama Dawímaxã chixexũ naxuegu norü tupanaégagu. ⁴⁴Rü nhüxüchi nhanagürü: —¡Nua nanha rü ngurucüguna rü aigüna tá chanaxã i cumachi! —nhanagürü. ⁴⁵Rü nüma ga Dawí nanangãxũga rü nhanagürü: —Cuma rü chaxcax quixü taramaxã rü wocaemaxã. Notürü i chamax rü cuxcax chixü naégagu ya yimá Iraéuanecüãx i churaragüarü Tupana ya guxüétüwa ngëxmacü ya cuma norü churaragüxũ cuxãxüneáxücü quixĩ. ⁴⁶Rü nhüxmax ya Cori ya Tupana rü tá chaxmexgu cunanguxexẽ nax cuxũ chimáxũcax. Rü tá cuxũ íchadaeeru rü ngéma curü churaragü i yuexũ rü tá ngurucüguna rü aigüna chanana. Rü ngémaacü tá guxü i naanewa nüxũ nacuxgü nax Iraéuanewa nangexmaxũ ya wüxi ya Tupana. ⁴⁷Rü guxãma ya yixema núma ngëxmagüxe rü tá nüxũ tacuxgü ya Cori ya Tupana rü tama taramaxã, rüxna wocaxemaxã nixĩ i naxüãxũ i ngéma nüma nagu naxĩnuxũ. Erü nüma ya Tupana rü tama duũxũgürüxũ ãxneãcü texemaxã nügü nadai. Rü nüma tátama nixĩ i tomexgu pexũ nayixẽxũ i nhüxmax —nhanagürü. ⁴⁸⁻⁴⁹Rü yexguma ga nüma ga Firitétanũxũ rü nayuxnagü rü Dawícax ninha. Rü yexgumarüxũ ta ga nüma ga Dawí rü paxama Firitétanũxũcax ninha. Rü norü chacugu nixu rü wüxi ga nuta nayaxu, rü norü maxgütaeruügu nanaxú. Rü yemamaxã Firitétanũxũxũ

namaxũ, rü meama nacatümaxã namexchinü. Rü guma nuta rü nacatüwa narüwax, rü nüma ga Firitéutanüxũ rü nachametümaxã nhaxtúanegu nayangu. ⁵⁰⁻⁵¹Rü yemaacü nixĩ ga Dawí ga Firitéutanüxũxũ naporamaexũ namaxã ga wüxi ga maxgütaexũ rü wüxi ga nuta. Rü nüma ga Dawí rü nangearu taraãx, rü yemaçax yema Firitéutanüxũçax ninha rü nanayaxu ga norü tara rü yemamaxãtama ínanadaeeru, rü yemaacü nayamaç. Rü yemaxũ nadaugügu ga Firitéutanüxũgü ga marü nax nayuxũ ga yema norü churara ga namaxã poraxũ, rü nibuxmü. ⁵²Rü yexguma ga Iraéuanecüãxgüaru churaragü rü Yudátanüxũ ga churaragü rü aita naxüe yerü marü Firitéutanüxũgüxũ narüporamaegü. Rü nawe nangëgü nhüxmata íanegü ga Gáyí rü Ecróuarü üüchiwa. Rü yema Firitéutanüxũgüaru churaragü ga yuexũ rü nanuquegü nawa ga yema nama ga Charafüwa ne daxũ rü nhüxmata íanegü ga Gáyí rü Ecróüwa nguxũ. ⁵³Rü nüma ga Iraéuanecüãxgü rü yema Firitéutanüxũgüwe nangëgüwena, rü yema ínapegüxüwa naxĩ rü nanade ga guxüma ga norü yemaxũgü ga yéma nüxna yabuxmüxũ. ⁵⁴Rü yexguma ga nüma ga Dawí rü nanayaxu ga Goriáxeru rü Yerucharéüwa nanange. Notürü ga guma naxnegü rü norü pegüpataügu nayanu. ⁵⁵Rü yexguma Dawí rü Firitéutanüxũçax inhaxgu, rü nüma ga Chaú rü norü churaragüeru ga Abnéna naca rü nhanagürü: —¿Texé tixĩ ya nanatü ya yimá ngextüxücü? —nhanagürü. ⁵⁶Rü nüma ga yema norü

churaragüeru ga Abné rü nanangãxũ rü nhanagürü: —Pa ãëxgacüx, tama nüxũ chacuax nax texé nane yixixũ —nhanagürü. Rü nüma ga Chaú rü nhanagürü nüxũ: —¿Ëcü, naxçax ícagüchigü nax texé nane yixixũ! —nhanagürü. ⁵⁷Rü yexguma Dawí rü yema Firitéutanüxüaru maçwa ne üxgu, rü nüma ga Abné rü Chaúpexewa nanaga namaxã ga yema Firitéutanüxüeru ga yangechigüxũ. ⁵⁸Rü nüma ga Chaú rü nüxna naca rü nhanagürü: —Pa Ngextüxücüx çhamaxã nüxũ ixu rü texé nane quixixũ! —nhanagürü. Rü nüma ga Dawí nanangãxũ rü nhanagürü: —Chama rü yimá curü duũ ya Yeché ya Beréücüãx nane chixĩ —nhanagürü.

**Yónataũ rü Dawí rü nügümaxã
nanaxuegu nax nügümücügü
yixigüxüçax**

18 ¹Rü yexguma Dawí Chaúmaxã igüegagu ga nügümaxã nax yadexagüxũ, rü nüma ga Chaú nane ga Yónataũ rü Dawímücüxũ nügü nixixëxë, rü nüxũ nangechaüxüchi nhama nügütama nangechaüxürüxũ. ²Rü nüma ga Chaú rü yematama ngunexügu Dawixũ nayaxu norü ngüxëerüxũ, rü tama nanatüçax nanamuegu. ³Rü Yónataũ rü Dawí rü Tupanaégagu nügümaxã nanaxuegugü nax nügümücügü nax yixigüxüçax yerü ga Yónataũ rü Dawixũ nangechaü nhama nügütama nangechaüxürüxũ. ⁴Rü nhüxüchi nüma ga Yónataũ rü ínacuxuchi ga yema napax ga nagu yacuxuuxũ rü Dawína nanaxã wüxigu namaxã ga yema norü tara rü norü

würa rü norü goyexũ. ⁵Rü nüma ga Dawí rü Chaúarü ngüxêëxuxũ nixĩ, rü guxũguma mea nayanguxêxê ga yema namuaxũwa. Rü yemaçax nüma ga Chaú rü norü churaragüarü ãëxgacüxũ nayangucuchixêxê. Rü yema duũxũgü rü churaragü rü naerugü rü namaxã nataãxêgü rü nanapëpünegü.

**Nixãuxãchi ga Chaú yerü ga
duũxũgü rü norü yexera Dawíxũ
nangechaũgü**

⁶Notürü yexguma nawoeguxgu ga churaragü nawena ga yema Firitétanüxũxũ nax yamáxũ ga Dawí, rü guxũnema ga Iraéuanecüãxgüarü ïanegüwa norü ãëxgacüçax ïnachoxũ ga ngexũgü ga taãxêácüma rü iyaxüächitanüácüma rü wiyægüácüma rü pãdérugü rü árpa napagüácüma norü ãëxgacüxũ rümõxegüxũ. ⁷Rü yexguma yema ngexũgü wiyægügu rü ïyaxüächitanüxũgu, rü nhaxũgu nawiyaegü: “Chaú rü 1,000 i churaragü nadai, rü Dawí rü 10,000 i churaragü nadai”, ngígürügügü. ⁸Rü yema wiyae nixĩ ga Chaúãxêwa ngüxũ, rü poraãcü nanuãcüma nhanagürü: —Dawína nanaxugüe nax 10,000 i churaragü nadaixũ, notürü choxna i 1,000 icatama. Rü nhuxmax ngêma taxuxũ nixĩ nax chauchicüxü ãëxgacüxũ yangucuchigüxêãxũ —nhanagürü. ⁹Rü yexgumacürüwa ga Chaú rü Dawíxũ namuũ. ¹⁰Rü moxüácü ga Tupana rü Chaúçax yéma nanamu ga naãxê ga chixexũ rü nüxna nangu. Rü nüma ga Chaú rü nhama naxãũãëxürüxũ nixĩ ga nachiüwa. Rü yexguma ga Dawí rü norü árpa napaxü to ga ngunexũgurüxũ. Rü

nüma ga Chaú rü guma norü wocae nange. ¹¹Rü ngürüächi Dawíxũ nanacux ga guma norü wocae nax ïxtapüxmaxã yapaitarexüçax, notürü nüma ga Dawí rü taxreexpüxcüna nügü ïnapoxüama. ¹²Rü nüma ga Chaú rü Dawíxũ namuũ, yerü Cori ya Tupana rü Dawíxũ narüngüxêë, notürü marü tama Chaúxũ narüngüxêë. ¹³Rü yemaçax ga nügüxütawa rü nayamugachi rü wüxitücumü ga 1,000 icatama ga churaragüarü ãëxgacüxũ nayangucuchixêxê. Rü yema churaragümaxã nixĩ ga Dawí ga daiwa naxüüxũ rü natæguxüxũ. ¹⁴Rü guxüma ga taxacü ga naxüxüwa ga Dawí rü meama nüxũ ïnanguxuchi yerü Cori ya Tupana nüxũ narüngüxêë. ¹⁵Rü yemaçax ga nüma ga Chaú rü nüxũ namuũ, yerü nüxũ nadau ga nhuxãcü norü yexera natachigamaexũ ga Dawí. ¹⁶Notürü guxüma ga Iraéuanecüãxgü rü Yudátanüxũ rü Dawíxũ nangechaũgü, yerü nüma nixĩ ga namaxã inacáxũ ga yexguma daiwa naxüxüxgu. ¹⁷Rü nüma ga Chaú rü wüxi ga ngunexũ Dawíxũ nhanagürü: —Cuxna tá ngüxũ chamu cuxmaxũ i ngêma chauxacü irüyamaecü i Merá ega wüxi ya poracü quixüxgu rü cunadaixgu i Cori ya Tupanaarü uanügü —nhanagürü. Rü nüma ga Chaú nagu narüxĩnü nax tama nümatama Dawíxũ yamáxũ, notürü norü ïnü chi nixĩ nax Firitétanüxũgü yamáxüçax nagu i dai. ¹⁸Notürü ga Dawí rü nanangãxũ rü nhanagürü: —Taxuxüma chixĩ i cupexewa, rü chautanüxũgü rü taxuxüma nixĩgü i Iraéuanegütanüwa nax cuxãxte nax chixüxüçax —nhanagürü. ¹⁹Notürü yexguma nawa

nanguxgu ga yema ngunexũ nax Dawína ngĩxũ namuxũ ga naxacũ ga Merá, rü nüma ga Chaú rü ngĩxũ namu nüxna ga to ga yatũ ga Meorácũx ga Adriégu áégaxũ. ²⁰Notürü ga yema nai ga Chaúxacü ga Micá, rü Dawímaxã ixäärũx. Rũ yexguma Chaúmaxã nüxũ yaxugũgu ga ngĩchiga, rü nüma ga Chaú rü nataãxẽ. ²¹Yerü nagu narũxĩnũ ga Dawína ngĩxũ nax namuxũ nax Dawímax yixĩxũcax rü ngĩma Firitéutanũxũgũmexẽgu nanguxẽãxũcax. Rũ yemacax ga nüma ga Chaú rü wenaxarũ Dawíxũ nhanagürü: —Rũ nhuxmax táwaxi nixĩ i chãũxte quixĩxũ —nhanagürü. ²²Rũ yemawena rü nüma ga Chaú rü norü ngũxẽeruũgũxũ namu rü nhanagürü: —¡Pema rü pexicatama namaxã pidexagü i Dawí, rü namaxã nüxũ pexu rü chama i ãëxgacü nax chixĩxũ rü poraãcü nüxũ changechaũ rü guxãma i pema i chorü ngũxẽeruũgü rü ta rü nüxũ nax pengechaũgũxũ rü penaxwaxexũ nax nüma rü chãũxte yixĩxũ, nhapegürü tá nüxũ! —nhanagürü. ²³Rũ nüma ga yema Chaúarü ngũxẽeruũgü rü yéma Dawíxütawa naxĩ rü namaxã nüxũ nixugü ga yema ore ga Chaú namaxã nüxũ ixuxũ. Notürü nüma ga Dawí rü nanangãxũga rü nhanagürü: —¿Ëxna pema nagu perũxĩnũegu i natauxchaxũ nax wũxie ya chauxrũx ngearü diëruáxe rü taxuxũma ixixe nax ãëxgacũxãte tixĩxũ? —nhanagürü. ²⁴Rũ nüma ga yema Chaúarü ngũxẽeruũgü rü Chaúmaxã nüxũ nayarũxugüe ga yema ore ga Dawí namaxã nangãxũxũ. ²⁵Notürü ga nüma ga Chaú ga nagu nax

naxĩnũiechaxũ ga nhuxãcü Dawíxũ Firitéutanũxũgũmexẽgu nax nanguxẽëchaũxũ, rü yemacax yema norü ngũxẽeruũgũmaxã nhanagürü: —¡Namaxã nüxũ pexu i Dawí rü tama chanaxwaxe i diëru choxna ngĩxũ naxã ngĩxcax i chauxacü! Notürü ngẽma natanü i chanaxwaxexũ nixĩ i 100 i Firitéutanũxũgũchaxmũxũpexechiraũgü nax nua nanaxũ nax ngẽmaãcü nax chanayauxtanũxũcax i ngẽma chorü uanügüaru chixexũ i chamaxã naxügũxũ —nhanagürü. ²⁶⁻²⁷Rũ nüma ga yema Chaúarü ngũxẽeruũgü rü Dawímaxã nüxũ nayarũxugü ga yema Chaúarü ore. Rũ nüma ga Dawí rü nataãxẽ namaxã ga yema Chaú naxcax ícaxaxũ, yerü yemaacü nüxũ nanatauxchaxẽxãma nax naãxte yixĩxũcax. Rũ naxũpa ga yema ngunexũ ga Chaú namaxã ixunetaxũ, rü nüma ga Dawí rü nananutaquexe ga norü churaragü rü inaxũãchi, rü 200 ga Firitéutanũxũgü nayadaí. Rũ yema Firitéutanũxũgũchaxmũxũpexechiraũgü rü Chaúna nayana nax yemaacü naãxte yixĩxũcax. Rũ yexguma ga nüma ga Chaú rü yema naxacü ga Micá Dawína ngĩxũ namu naxmaxũ. ²⁸Notürü nüma ga Chaú rü nüxũ nicuaxãchi nax nüma ga Cori ya Tupana rü Dawíxũ nangũxẽexũ, rü naxacü ga Micá rü Dawíxũ nangechaũxũchi. ²⁹Rũ yemacax yexeraãcü Dawíxũ namuũ rü naxchi naxai. ³⁰Rũ yexguma Firitéutanũxũgüaru churaragũmaxã nügü nadaixũgu, rü nüma ga Dawí nixĩ ga guxũma ga togü ga Chaúarü churaragüeruarü yexera norü uanügũxũ narüporamaexũ. Rũ yemacax nixĩ ga

guxũma ga duũxũgũ nüxũ
ngechaũgũxũ.

Chau rü Dawixũ nimáxchaũ

19 ¹Rü nüma ga Chau rü nane ga Yónataũxũ rü guxũma ga norü churaragũxũ namu ga Dawixũ nax yamaçgũxũcãx. Notürü nüma ga Yónataũ rü poraãcü Dawixũ nangechaũ. ²Rü yemaçax ga Yónataũ rü Dawímaxã nüxũ nixu ga yema nanatüarü ore, rü nhanagürü: —Chorü papá ya Chau rü cuxũ timáxchaũ. Rü ngẽmacãx i moxũ paçmama ;rü naxuãxẽ rü nawa naxü i ngẽma naane i taxúema nawa cuxũ dauxũ, rü ngẽxma icux! ³Rü chama rü ngẽma naane i nagu quicúxũwa tá chaunatumãxã chaxü. Rü cuchigaxũ tá tümamaxã chixu, rü ngoxi nhuxü nhatagü. Rü yixcama tá cuxũ nüxũ chacuãxẽxẽ i ngẽma chaunatüarü ore —nhanagürü. ⁴Rü nüma ga Yónataũ rü nanatü ga Chaúmaxã nidexa rü Dawíétüwa nachogü rü nhanagürü: —Pa ãëxgacüx, tama name i chixexũ cuxü namaxã i curü duũxũ i Dawí, erü taxuxũma i chixexũ cumaxã naxü. Rü guxũguma mea cuxũ narüngũxẽẽ. ⁵¿Ëxna marü nüxũ curüngũma ga yexguma norü maxũ ãñcũmaxũwa nayexmaxẽëgu ga Goriáxũ yamaçgu, rü yemaacü ga Cori ya Tupana rü Iraéuanecüãxgũxũ guxchaxũwa ínanguxũxẽxẽ? Cumax, Pa ãëxgacüx, rü nüxũ cudau ga yema, rü cutaãxẽ. ¿Rü tũxcüũ, Pa ãëxgacüx, i cuyamáxchaũxũ i wüxi i duũxũ i taxuxũma cumaxã üxũ? ¿Rü taxacüçax tá cuyamaç ya Dawí? —nhanagürü. ⁶Rü yexguma Chau nüxũ ñnúgu ga yema Yónataũ namaxã nüxũ

ixuxũ, rü tagaãcü nhanagürü: —Cori ya Tupanaégagu nüxũ chixu rü taxütáma chayamaç ya Dawí —nhanagürü.

.....

Chauçaxwa ninha ga Dawí

22 ¹Rü nüma ga Dawí rü Gáyüwa ínaxuxũ rü ãxmaxũ ga Aduráũgu narüçux. Rü yexguma naeneegü rü guxũma ga natanüxũgü nüxũ cuãxgügu rü naxütawa naxí rü nayaxümüçügü. ²Rü yexgumarüxũ ta naxütawa naxí ga yema duũxũgü ga tama ãëxgacü nüxũ rüngũxẽëgũxũ rü yema duũxũgü ga nangetanüxũ rü yema duũxũgü ga tama ãëxgacümaxã taãxëgũxũ, rü nüma ga Dawí rü yema duũxũgüeru nixí. Rü yema duũxũgü ga Dawíwe rüxixũ rü düxwa 400 ga yatügüwa nangu.

.....

⁵Rü wüxi ga ngunexũgu ga Tupanaarü orearü uruxü ga Gáyü rü Dawímaxã nüxũ nixu nax nüxna yaxüçaxixũcãx ga yema ãxmaxũ rü Yudáarü naaneçax natáeguxũcãx. Rü nüma ga Dawí rü naixnecü ga Árewa nangu.

.....

Dawí rü ínachianexũ ga taxúema íxãpataxũwa nayexma

23 ¹⁴Rü nüma ga Dawí rü yema çianexũ ga Chípewa naxü, rü yéma wüxi ga maçpúnearü ãxmaxũwa norü duũxũgümaxã nayexma. Rü nüma ga Chau rü guxũma ga ngunexũgu naxçax nadau, notürü ga Tupana rü Dawína nadau, rü yemaçax ga Chau rü taguma nüxũ inyangau. ¹⁵Notürü nüma ga Dawí rü Chauçax namuũ, yerü

naxçax nadau ga nax yamáaxũçax. Rü yemacax ga Dawí rü naixnecü ga Oréchigu narüxãũx ga chianexũ ga Chípewa. ¹⁶Rü wüxi ga ngunexũgu, rü nüma ga Yónataũ ga Chaú nane rü Oréchiwa naxü ga Dawí íyexmaxũwa. Rü nayataãxêxêxê rü pora nüxna nayaxã nax yexera Tupanaaxũ yaxõõxũçax. ¹⁷Rü Dawíxũ nhanagürü: —Taxuçaxma cumuũ erü chaunatü ya Chaú rü tagutãma cuxũ itayangau. Cuma rü tá Iraéuanecüãxgüarü ãêxgacü quixĩ, rü chama rü tá cutũüwa chaxü. Rü ngêma rü chaunatü ya Chaú rü marü nüxũ tacuçax —nhanagürü. ¹⁸Rü yexguma ga nüma ga Dawí rü Yónataũ rü Cori ya Tupanapexewa nügümaxã inaxügae. Rü yemawena ga Yónataũ rü natáegu, rü nüma ga Dawí rü yexmatama Oréchigu narüxãũx. ¹⁹Notürü yema nachica ga Chífecüãx ga duũxũgü, rü Yibéawa naxĩ rü Chaúmaxã narüdexagü, rü nhanagürügü: —Dawí rü torü naanegu nicux nagu i ngêma ãxmaxũgü i maxpüne ya Aquiráwa ngêxmagüxũ i Oréchiarü naixnecüwa i ngêma chianexũ i nawa tangexmagüxũarü súwaama. ²⁰Rü ngêxguma curü me yixĩxgu, Pa ãêxgacüx ¡rü towe rüxü! Rü toma rü tá cuxçax tayayauxgü rü cuxna tá tanamu —nhanagürügü. ²¹Rü nüma ga Chaú rü nanangãxũ rü nhanagürü: —¡Tupana pexũ rüngüxêxê erü choxũ pengechaũ rü chagu perüxĩnüe! ²²¡Ru êcü pewoegu i nhuxmax, rü mea naxçax peyadaux i ngêma nachica i nawa nangexmaxü! Rü ngêxguma nüxũ ipeyangaxgux rü ¡chamaxã nüxũ peyarüxu! Erü nüma rü naãxêxũ nacuçaxüchi. ²³¡Rü mea nüxũ pidaugü i

guxũma i norü cuxchicaxũ rü nhuxüchi nua chamaxã nüxũ peyarüxu! Rü chama rü tá pewe ngêma chaxü. Rü ega aixcuma ngêma naanewa nangexmagu, rü chama rü tá naxçax chadauama natanügu i ngêma Yudátanüxũ —nhanagürü. ²⁴Rü nüma ga yema Chífecüãxgü rü Chaúxũ narümoxêgü, rü nhuxüchi norü íanecax nawoegu. Rü nüma ga Dawí rü norü churaragümaxã rü chianexũ ga Maóüwa nayexmagü ga yema chianexũarü súwaama. ²⁵Rü nüma ga Chaú rü norü churaragü rü inaxĩachi nax naxçax nayadaugüxũçax. Rü yexguma yemaxũ nacuçaxgu ga Dawí, rü guma maxpünearü ãxmaxüwa nixĩgachi rü toxnamana naxĩ ga Maóüarü chianexũwa. Rü nüma ga Chaú rü yema Maóüarü chianexũgu naxücu nax yexma Dawíçax nadauxũçax. ²⁶⁻²⁷Rü nüma ga Chaú rü guma maxpünearüwagu namaxã nixü ga norü churaragü. Rü nüma ga Dawí rü norü tocüwagu Chaúchaxwa nibuxmü namaxã ga norü churaragü. Rü yexguma marü Chaú norü churaragümaxã Dawíxũ ínaxüexũgu nax yayauxgüaxũçax, rü Chaúxütawa nangu ga wüxi ga orearü ngeruxũ ga namaxã nüxũ yarüxuxũ nax paxa natáeguxũçax yerü ga Firitéutanüxũgü rü wenaxarü Iraéuanecüãxgüçax ínayaxüachi. ²⁸Rü yemacax ga nüma ga Chaú rü ínanangêx ga Dawíwe nax yangêchigüxũ, rü natáegu nax Firitéutanüxũgümaxã nügü yadaixũçax. Rü yexgumacürüwa ga yema nachica ga Dawí nawa yexmaxü rü “Maxpüne ya Nawa Yigüna Ixĩgachitanüächínegu” naxãéga. ²⁹Rü yemawena ga Dawí rü

Egádiaru chianexũwa naxũ nax yéma m̄axpúnegüaru äxmaxũwa nayexmaxũçax.

Dawí rü tama Chaúxũ nim̄ax

24 ¹Rü yexguma natáegugu ga Chaú ga Firitéutanüxũgümaxã nügü inadaixũwa, rü namaxã nüxũ nixugügü ga Egádiaru chianexũwa nax nayexmaxũ ga Dawí. ²Rü yexguma ga Chaú rü 3,000 ga churaragü nidexechi ga guxũma ga Iraéuanecüãxgütanüwa, rü Dawíçax nayadaugü nagu ga guma m̄axpúnegü. ³Rü yexguma namagu naxixgu ga Chaú, rü yexma nüxũ nangau ga nhuxre ga carnérutücümügü norü ngaicamagu ga wüxi ga m̄axpúnearü äxmaxũ ga nagu yacúxũ ga Dawí norü churaragümaxã. Rü nüma ga Chaú rü yema äxmaxũgu nangaxi nax yexma íyawoxéxũçax. ⁴Rü nüma ga Dawíaru churaragü rü nhanagürügü Dawíxũ: —Nhuxmawaxi nixĩ i yanguxũ ga yema uneta ga Cori ya Tupana cumaxã nüxũ ixuxũ nax cumexgu nanguxêäxũ i ngêma curü uanü. ¡Rü êcü yam̄ax cuma nagu curüxñnũxũãcuma! —nhanagürügü. Rü nüma ga Dawí rü bexma yam̄axcũxchigüãcuma yéma naxũ rü Chaúaru deyuxũchiru íxraxũ niwiepechinü. ⁵Notürü ga yixcüama ga Dawí rü poraãcü nüxũ nangux ga yema naxixũ. ⁶Rü nhanagürü norü churaragüxũ: —¡Cori ya Tupana choxũ rüngüxêxê nax tama taxacü namaxã chaxüxũçax i ngêma chorü ãëxgacü! Nüma rü ãëxgacü nixĩ yerü Cori ya Tupanatama nüxũ naxuneta —nhanagürü. ⁷Rü yemaacü ga Dawí rü

nüxna nachogü ga norü churaragü yerü tama nanaxwaxe nax Chaúxũ nax yam̄axgüxũ. Rü nüma ga Chaú rü inaxüxũ ga yema äxmaxũwa rü inaxĩ. ⁸Notürü nüma ga Dawí rü Chaúwetama inayago ga yema äxmaxũwa rü nüxna naca rü nhanagürü: —Pa ãëxgacüx, Pa ãëxgacüx —nhanagürü. Rü nüma ga Chaú rü nügü nadauegu. Rü nüma ga Dawí rü nhaxtíanegu yangücuchiãcuma nüxũ narümoxê. ⁹Rü nhanagürü nüxũ: —¿Tüxcüü i naga cuxñnũxũ, Pa ãëxgacüx, i ngêma duüxũgü i cumaxã nüxũ ixuxũ nax chama rü naxçax chadauxũ nax cuxũ chimáxũ? ¹⁰Pa Chorü ãëxgacüx, nhuxmawaxi nixĩ i aixcuma nüxũ cucuáxũ nax tama cuxũ chimáxchaũ. Rü woo Cori ya Tupana rü çaxmexgu cuxũ nax nanguxêchiréxũ i nua m̄axpúnearü äxmaxũwa, notürü i chama rü tama cuxũ chim̄ax, Pa ãëxgacüx. Erü nagu charüxñnũ nax cuma rü ãëxgacü quixixũ erü Cori ya Tupana rü marü ngêmacax cuxũ naxuneta. ¹¹¡Rü dücax, mea nuxã nadawenü, Pa ãëxgacüx, i nhaa çaxmexwa ngêxmaxũ! ¿Tama êxna curü gáuxũchirutüchi yixixũ i nhaa? Rü ngêmawa nüxũ cucuax nax marü chi cuxũ nax chimáxũ. Rü ngêmawa nüxũ cucuax, Pa ãëxgacüx, nax taxuxũma i chixexũ cumaxã chaxüxchaũxũ, rü tama çanaxwaxexũ nax çacuechitaexũ rü bai i nhuxgu taxacürü chixexũ cumaxã chaxüxũ. Notürü i cumax, Pa ãëxgacüx, rü chawe quingêchigü nax choxũ quimáxũçax. ¹²¡Rü Tupana nangugü i ngêma yigümaxã ixuxũ! Rü nüma nixĩ i nüxũ nacuáxũ i taxacü tá cumaxã naxüxũ, notürü i çamax, Pa ãëxgacüx,

rü tagutáma taxacürü chixexũ cumaxã chaxü —nhanagürü.

.....

¹⁶Rü yexguma Dawí rü chianegu nax yadexaxũ, rü nüma ga Chaú rü tagaãcü nanangãxũga rü nhanagürü: —¿Ëxna cuma quixixũ, Pa Chaunex, Pa Dawíx, i chamaxã quidexaxü? —nhanagürü. Rü nhuxũchi inanaxüğü ga nax naxaxuxũ. ¹⁷Rü nhanagürü Dawíxü: —Ngẽma cuma nüxũ quixuxũ nixĩ i aixcuma ixixũ. Erü cuma rü mexũ choxũ cudaduxẽ nax woo chixexũ cumaxã chaxixũ i chamax. ¹⁸Rü nhuxmax rü aixcumaxũchi choxũ cunawex nax cuma rü naxçax cudaduxĩ nax mexũ chamaxã cuxixũ. Erü nüma ya Cori ya Tupana rü marü cuxmexgu choxũ nanguxẽẽchirẽx nax choxũ quimáxũçax, notürü tama choxũ quimax. ¹⁹Rü aixcuma nixĩ i nataxuxũma i duũxũ i norü uanũxũ maxẽẽxũ ega naxmexẽgu nanguxgu. Rü ngẽmacax ¡Tupana cuxũ naxũtanü naxçax i ngẽma mexũ i nhuxmax chamaxã cuxixũ! ²⁰Rü nhuxmawaxi nixĩ i aixcuma nüxũ chicuaxãchixũ nax cuma tá yixixũ i Iraéuanecüãxgüarü ãẽxgacü quixixũ. Rü cuma tá nixĩ i namaxã icucuaxũ, rü cuxmexwa mea tá Iraéuanecüãxgüxũ nangupetü. ²¹¡Rü ěcü Tupanaégagu chamaxã nüxũ ixu rü tagutáma cuyanaxoxẽxẽ i ngẽma chautaağü nax ngẽmaãcü tagutáma iyanaxoxũçax i chauéga i chautanũxũgütanüwa! —nhanagürü. ²²Rü nüma ga Dawí rü Tupanaégagu Chaúmaxã inaxuneta. Rü yemawena ga nüma ga Chaú rü napataçax natáegu. Rü nüma ga Dawí rü norü churaragümaxã wenaxarü yema maxpũnearü ãxmaxũwa naxü.

.....

Dawí rü wenaxarü tama Chaúxũ nimax

26 ¹Rü yema duũxũgü ga ñane ga Chípegu achiũgüxũ rü Yibéawa naxĩ ga Chaú íyexmaxũwa rü nhanagürüğü nüxũ: —Dawí rü maxpũne ya Aquirágu nicyx i ngẽma taxúema íxãchiũxũarü toxmaxtawa —nhanagürüğü. ²Rü yexguma ga Chaú rü inaxũãchi namaxã ga 3,000 ga Iraéuanecüãxgüarü churaragü ga nüxũ rücuaxmaegüxũ ga daiwa, rü Chíarü chianexũwa naxĩ nax Dawíçax yadağüxũçax. ³Rü nüma ga Chaú rü norü churaragümaxã maxpũne ya Aquirá ga namacüwawa yexmanegu nayape ga yema chianexũarü toxmaxtawa. Notürü nüma ga Dawí ga yema chianexũwa nax nayexmaxũ, rü nüxũ nacuax ga Chaú nawe yéma nax ngẽxũ. ⁴Rü yemacax ga Dawí rü ngugütaeruüğü yéma namugü nax nüxũ nacuáxũçax ga ngextá nax nayexmaxũ ga Chaú. ⁵Rü yemawena ga Dawí rü Chaú íyexmaxũwa naxü, rü nayangüğü nax ngexta napegüxũ ga Chaú rü Abné ga Né nane ga Chaúarü churaragüarü ãẽxgacü. Rü nüma ga Chaú rü norü duũxũgüarü ngãxũtanügu nape. ⁶Rü yexguma ga nüma ga Dawí rü nidexa namaxã ga Aimére ga Etétanũxũ ixicü, rü Abichái ga Cheruá nane ga Yoábeenexẽ. Rü yemagüna naca rü nhanagürü: —¿Texe ya ímemarexe nax chawe tarüxũxũ nax Chaú íngexmaxũwa ixixũ? —nhanagürü. Rü nüma ga Abichái nanangãxũga rü nhanagürü: —Chama tá cuwe charüxũ —nhanagürü. ⁷Rü yematama ga

chütaxũgu ga Dawí rü Abichái rü yéma Chau íyexmaxũwa naxĩ. Rü nüma ga Chau rü norü churaragüarü ngãxũtanügu nape rü norü wocae rü naeruxũtaguama napu. Rü nüma ga Abné rü norü churaragümaxã nüxũ ínacamaeguãchi. ⁸Rü yexguma ga Abichái rü Dawíxũ nhanagürü: —Nhuxma ya Tupana rü cuxũ nanatauxchaxẽ nax cuyamáxũcax i curü uanü. Chayamãtaxax nixĩ, rü norü wocamaxãtátama nhaxtãnewa chayapaitü, rü marü ngẽmamaxã tátama nayu —nhanagürü. ⁹Notürü nüma ga Dawí rü nanangãxũga rü nhanagürü: —¡Tauxũ i cuyamáxũ! Erü texé ya yíxema yamáxe i ngẽma ãẽxgacü i Tupana nüxũ unetaxũ, rü Tupana rü tautáma nanangupetüxẽmare nax tüxũ napoxcuxũ. ¹⁰Rü Cori ya Tupanaégagu cumaxã nüxũ chixu rü nüma ya Tupana tá nixĩ i norü maxũ nüxna nayaxuxũ, rü woetátama nayuxẽmareã rüexna daigu nayuxẽxã. ¹¹¡Rü Cori ya Tupana choxũ rüngũxẽxẽ nax tama nagu charüxĩnũxũcax nax chayamáxũ ya yimá ãẽxgacü ya nümatama ya Cori ya Tupana nüxũ unetacü! ¡Rü nayaxu ya yima wocae ya naeruxũtagu puxucü rü ngẽma dexápaxũ, rü ngĩxã ítxĩ! —nhanagürü. ¹²Rü yemaacü ga Dawí rü nanayaxu ga guma wocae rü dexápaxũ ga Chaueruxũtagu nuxũ, rü ínixĩ. Rü taxuxũma nüxũ nadau rü bai nüxũ naxĩnü. Rü taxuxũma nabajxãchi. Rü guxũma napeexüchi, yerü Cori ya Tupana nanapeexẽxũchi. ¹³Rü yemawena ga Dawí rü namücü rü yema ngatexũarü tocutüwa naxĩ rü wüxi ga mãxpúnetapegegu naxĩgü, rü yemaacü

nüxna niyãxũtãniãchi. ¹⁴Rü yexguma ga Dawí rü tagaãcü Abnéna rü norü churaragüna nacagü, rü nhanagürü: —¡Pa Abnéx, choxũ nangãxũga! —nhanagürü. Rü nüma ga Abné rü nanangãxũga rü nhanagürü: —¿Texé quixĩ i cumax ecax tagaãcü ãẽxgacüna cucaxaxũ? —nhanagürü. ¹⁵Rü Dawí nanangãxũga rü nhanagürü: —¿Tama ãxna cuma quixĩxũ i guxũma i Iraéuanecüãxgüarü churaragümaxã icucuáxũ? ¿Rü nhuxãcü tama mea nüxna cudauxũ ya curü cori ya ãẽxgacüx? Erü wüxi i duũxũ ngẽxma naxücu nax yamáaxũcax. ¹⁶Rü tama name i ngẽma cuxüxũ. Chama rü Cori ya Tupanaégagu cumaxã nüxũ chixu rü name nixĩ nax cuyuxũ, erü tama mea nüxna cudau ya curü ãẽxgacü ya Cori ya Tupana nüxũ unetacü. ¡Naxcax nadau ya norü wocae rü norü dexápaũ ga naeruxũtaguama nuxũ, rü ngoxita ngextá nüxũ cuyangaux! —nhanagürü. ¹⁷Rü yexguma Chau nüxũ cuaxgu nax Dawí yixixũ ga yéma idexaxũ, rü tagaãcü yexma nacagü rü nhanagürü: —¿Ëxna cuma quixĩxũ, Pa Chaunex, Pa Dawíx? —nhanagürü. Rü nüma ga Dawí rü nanangãxũga rü nhanagürü: —Ngũ, Pa ãẽxgacüx, chama chixĩ. ¹⁸¿Notürü tũxcüü chawe quingẽchigü Pa ãẽxgacüx, i chama nax curü duũxũ chixixũ? ¿Rü taxacü chaxü? ¿Rü taxacürü chixexũ cumaxã chaxü? ¹⁹Chama i curü duũxũ nax chixixũ rü cuxũ chacaxã Pa ãẽxgacüx nax choxũ cuxĩnũxũ. Rü ngẽxguma chi Tupana cuxna ñügu, Pa ãẽxgacüx, nax chamaxã curüxuanũxũcax ¡rü nayaxu i chorü ãmare nax chamaxã

curüngüxmüxüçax! Notürü ngëxguma chi cumatama nagu curüxĩnúgu nax chauxchi cuxaixü, rü Tupana tá nixĩ ya nüxü cuacü nax cuxü naxütanüãxü naxçax i ngëma. Yerü cuma nixĩ ga Tupanaarü duüxügüarü naanewa choxü ícutaxüchixü nax ngëmaãcü togü i tupanaxü chicuaxüüxüçax. ²⁰Rü tama chanaxwaxe i Tupanaarü duüxügüarü naanearü yáxügu chayü i ngextá tupanaxetaxü íyacuaxüüxügüxüwa. Notürü i cumax, Pa ãëxgacüx, rü nhama wüxi i airuchicax idauxürüxü chauxçax cudau rü nhama wüxi i ngugacax idauxürüxü chawe quingëchigü i daa maxpünegüwa —nhanagürü. ²¹Rü yexguma ga Chau rü nhanagürü: —Pa Chaunex, Pa Dawíx, rü nüxü chicuaxächi nax chixexü chaxüxü. Rü nhama wüxi i duüxü i ngeãxëmarexürüxü chamaxü, rü poraãcü íchatü. ¡Ëcü natáegu, rü taxuxütáma i chixexü cumaxá chaxü! Erü nhama i ngunexügu rü nüxü cungechaü i chorü maxü, rü tama choxü quimax —nhanagürü. ²²Rü nüma ga Dawí rü nanangãxüga, rü nhanagürü: —Daa nixĩ ya curü wocae, Pa ãëxgacüx ¡rü wüxi i curü duüxü nua ü nax yayauãxüçax! ²³Rü Tupana tüxü naxütanü ya wüxíechigü naxçax i ngëma mexü nax taxüxü rü ngëma nax tixaixcumaxü! Erü chama rü nhama i ngunexügu rü tama cuxü chimáxchaü ga yexguma Tupana choxü natauxchaxëëgu ga cuxü nax chimáxüçax. ²⁴Rü ngëma nax nhuxmax curü maxüxü changechaüxürüxü rü tama cuxü nax chimáxü, Pa ãëxgacüx, rü ngëxgumarüxü ta chanaxwaxe i Cori

ya Tupana nüxü nax ngechaüxü i chorü maxü rü nawa choxü ínanguxuchixëëxü i guxüma i nhaa ngüxügü —nhanagürü. ²⁵Rü yexguma nüma ga Chau rü tagaãcü nhanagürü: —¡Tupana cuxü rüngüxëxë, Pa Chaunex, Pa Dawíx! Rü taxü i mexü tá cuxü, rü guxüwatáma mea cuxü ínanguxuchi —nhanagürü. Rü yemawena ga Chau rü nachüçax natáegu. Rü nüma ga Dawí rü nixüchigüama.

**Chau rü Eüdüwa naxü ngixütawa
ga wüxi ga ngecü ga yuücü**

28 ³Rü yexguma ga Chamué rü marü nayu. Rü guxüma ga Iraéuanecüãxgü rü naxçax naxaxue, rü yemawena rü guma ñane ga nagu nabuxüne ga Ramágu nanataxgü. Rü nüma ga Chau rü ga üpaacü marü ínanawoxü ga guxüma ga yema ëxügüxüxü cuaxgüxü rü yema yuetaãëgüçax ngëmagüxü. ⁴Rü nüma ga Firitéutanüxügüarü churaragü rü nangutaquexegü rü Chunéüwa naxĩ rü yexma nayapegü. Rü nüma ga Chau rü guxüma ga Iraéuanecüãxgüarü churaragüxü nangutaquexexëxë rü Yibóagu nügü ninu. ⁵⁻⁶Notürü nüma ga Chau rü yexguma yema Firitéutanüxügüarü churaragüxü nadaxgu, rü poraãcü nabaxächi rü namuü. Rü Tupanana naca ga taxacü tá nax naxüxü. Notürü nüma ga Tupana rü tama nanangãxüga woo nanegüwa, rü woo yema cuaxruxü ga chacherdótegüarü ãëxgacü ingexü ga Urfüwa, rü woo Tupanaarü orearü uruügüwa. ⁷Rü yemaçax ga Chau rü

norü churaragüxü namu rü nhanagürü: —¡Ëcü ngïxcax pedax i wüxi i nge i nüxü cuaxcü nax yuetacax nangemaxü, nax ngéma chaxüxcax, rü ngïxna chayacaxücx! —nhanagürü. Rü nüma ga churaragü rü nanangäxügü rü nhanagürügü: —Rü Eüdüwa ingexma i wüxi i nge i nüxü cuaxü nax yuetaäcax nangemaxü —nhanagürügü. ⁸Rü nüma ga Chau rü nügü nanatoxchiraxüxcax, rü taxre ga namücügü íngagü, rü chütacü yema ngexüxütawa naxü, rü nhanagürü ngïxü: —Namaxä chidexachaü i wüxi i duüxü i yuxü. ¿Rü cuxü natauxchaxü i naäcax nax cungemaxü? —nhanagürü. ⁹Rü ngïma ga yema nge rü inangäxü rü ngïgürügü: —¿Taxacü nixi? ¿Ëxna cunaxwaxe nax choxü yamaxgüxü? Cuma nüxü cucuax ga Chau rü guxüma ga yema ëxüguxüxcax cuaxgüxü rü duüxë ga yuetacax ngëmagüxü rü nanadaí. Cuma rü wüxi i ngügütaeruümare quixí —ngïgürügü. ¹⁰Notürü nüma ga Chau rü Cori ya Tupanaégagu nhanagürü ngïxü: —Tupanaégagu cumaxä nüxü chixu rü taxutáma i taxacü cuxü nangupetü —nhanagürü. ¹¹Rü ngïma ga yema nge rü inangäxüga rü ngïgürügü: —¿Rü texë cutümawaxe nax tümacax changemaxü? —ngïgürügü. Rü nüma ga Chau rü ngïxü nangäxüga rü nhanagürü: —¡Chamuécax nangema! —nhanagürü. ¹²Rü ngürüächi ga yema nge rü Chamuéxü idau, rü aita ixü. Rü nhüxüchi Chauxü ngïgürügü: —¿Tüxcüü choxü cuwomüxcax? Cuma rü Chau quixí —ngïgürügü. ¹³Notürü nüma ga äëxgacü rü nhanagürü ngïxü: —¡Tauxü i cumuüxü! ¿Taxacüxcax cudau?

—nhanagürü. Rü ngïma ga nge rü inangäxüga rü ngïgürügü: —Nüxü chadau i wüxi i tupana i nhama i naanewa chüxnagüxü —ngïgürügü. ¹⁴Rü nüma ga Chau rü ínaca rü nhanagürü: —¿Nanhuxraxüxcax? —nhanagürü. Rü ngïma ga yema nge rü inangäxüga rü ngïgürügü: —Wüxi i yaxguax i maxpáxü nixí —ngïgürügü. Rü nüma ga Chau rü yexgumatama nüxü nicuaxächi ga Chamué nax yixüxü. Rü nhaxtüanegu nanangücuchi. ¹⁵Rü yexguma ga Chamué rü nhanagürü: —¿Taxacücx i choxü cuchixewexü rü nua choxü cuxüxcax? —nhanagürü. Rü nüma ga Chau nanangäxüga rü nhanagürü: —Poraäcü chaxoëgaäxë, erü nüma i Firitétanüxügü rü toxcax ínayaxüächi, notürü nüma ya Tupana rü marü choxna nixügachi rü tama choxü nacuaxchaü, rü tama choxü nangäxüga i orearü uruügwüwa rüxna chaunegüwa. Rü ngëmacax nixí i cuxcax changemaxü nax cuxna chaxaxücx nax taxacü tá chaxüxü —nhanagürü. ¹⁶Rü nüma ga Chamué nanangäxüga rü nhanagürü: —¿Tüxcüü choxna cuca ega Tupana rü marü cuxü naxoxgu rü curü uanüxü nügü yaxüxcax? ¹⁷Rü Cori ya Tupana cumaxä nayangüxcax ga yema chawa cumaxä nüxü yaxuxü. Rü cuxna nanayaxu nax äëxgacü quixüxü rü yimá naxchi cuxaicü ya Dawína nanaxä. ¹⁸Rü ngëmaäcü cumaxä naxüpetü ya Tupana, yerü tama naga cuxinü ga yema cuxü namuxüwa rü tama cuyangüxcax ga Amaréchitanüxügü nax cudaixü. ¹⁹Rü ngëmacax i nüma ya Tupana rü tá Firitétanüxügü mexëgu pexü nayüxcax i cuma rü cunegü rü guxüma i

Iraéuanecüãxgiarü churaragü. Rü tá pexü nadai rü ngëmacax i moxü i cuma rü cunegü rü nua chauxütawa tá marü pengexmagü. Rü ngëmawena i ngëma Firitéutanüxügü rü tá pexna nanapuxü i guxüma i taxacü pexü ngëxmaxü i cuma rü curü churaragü —nhanagürü. ²⁰Rü yexguma yema Chamuéarü orexü naxínügu ga Chaú, rü poraäcü namaxã nabaixächiãxë rü yexma niyuächi rü nhama wüxi ya nai i wáxünerüxü niwax. Rü naétü rü naturaxüne yerü taguma nachibü ga wüxi ga ngunexü rü wüxi ga chütaxü. ²¹Rü yexguma Chaúxü nadaxgux ga yema nge ga nhuxäcü nax naxixächiãxü, rü naxcax iyaxü rü ngigürügü nüxü: —Chama nax curü duüxü chixixü rü marü chanaxü i ngëma naxcax ícucaxaxü. Rü woo äücümaxüwa nangexma i chorü maxü rü chanaxüama i ngëma choxü cumuxü. ²²Rü ngëmacax i nhuxmax rü cuxna chaca nax choxü icurüxínüxü. Rü íxraxü i òna tá cuxna chaxã nax ngëmaäcü cuporaxücax nax cutáeguxücax —ngigürügü. ²³Rü nüma ga Chaú rü tama nachibüchaü, notürü ga yema norü churaragü rü yema nge rü nüxü icaxügüama, rü yemacax düxwa: —Ngü —nhanagürü. Rü yexgumatama inachi ga nhaxtüanegu nax nanguxü, rü wüxi ga pechicaxüwa narüto. ²⁴Rü yexgumayane ga ngüma ga yema nge rü iyamax ga wüxi ga wocaxacü ga ingüxü ga ngüchiüwa yexmaxü. Rü iyanhumü ga trígutexe, rü poü ga ngearü puxëruüáxü ta ixü. ²⁵Rü yemawena rü inaxüwemü ga guma äëxgacü rü norü

duüxügü. Rü nümagü rü nachibüe, rü nhuxüchi nawoegu yematama chütaxügu.

.....

Chaú rü nanegüarü yuxchiga

31 ¹Rü nüma ga Firitéutanüxügü rü Iraéuanecüãxgümaxã nügü nadai, rü ga Iraéuanecüãxgü rü naxchaxwa nibuxmü. Rü namuxüchima ga Iraéuanecüãxgü ga maxpüne ga Yibóagu yuexü. ²Rü nüma ga Firitéutanüxügü rü Chaúwe rü nanegüwe nangëgü rü tüxü nadai ga nanegü ga Yónataü, rü Abinadábi, rü Maquichúa. ³⁻⁴Rü yemawena ga yema wüwatanüxü rü Chaúmaxã namechinügü, rü poraäcü nanapixëëgü. Rü yemacax ga Chaú rü norü poxüruüxü nhanagürü: —¡Curü taramaxã choxü imax naxüpa nax choxü yayauxgüxü rü ngüxü choxü yangexëëgüxü, rü choxü yamaxgüxü i nhaa Firitéutanüxügü i tama Tupanaxü cuaxgüxü! —nhanagürü. Notürü nüma ga yema norü poxüruxü rü tama nayamáxchaü, yerü nüxü naxäücüma. Rü yemacax ga nüma ga Chaú rü norü tara nayaxu rü yemamagugu nügü nanha rü yemaacü nitoxpetü rü nayu. ⁵Rü yexguma yemaxü nadaxgux ga yema norü poxüruxü, rü nüma rü ta norü taramagugu nügü nanha rü Chaúruxü yemaacü nayu. ⁶Rü yemaacü yematama ga ngunexügu nayue ga Chaú rü norü poxüruxü rü guma tamaepüx ga nanegü rü muxüma ga norü churaragü.

.....